



Wasa Rice 200g
Em Skel Ya
GROWN FOR THE PEOPLE OF PNG



NASFUND OPIM MODEN BOROKO BRENS: Olpela opis bilong NASFUND long Boroko i kisim nupela senis bihain long wok kamap long en. Nau ol memba bilong NASFUND bai i no inap moa wari long sanap long lain. Dispela nupela opis i gat olgeta samting stap insait long en. Poto i soim CEO Ian Tarutia na Siaman bilong NASFUND Hulala Tokome wantaim ol wok manmeri bilong Nupela Boroko opis. *Poto Nicky Bernard.*

Insait:

Isten Hailans redi long 2017 Ileksen - P2



Kina bai lukautim mani bilong Nasfund - P3



BSP opim nupela Diposit ATM masin - P3

Vot pepa bai kam long mun Mas

VOT pepa bilong 2017 Nesanel Ileksen em wanpela kampani bilong Indonesia i prininim bai kam insait long kantri long mun Mas, Ilektoral Komisina Patalias Gamato i tok.

Em i tok long pinis bilong mun Mas na long stat bilong mun Epril,

ol vot pepa we wanpela kampani bilong Indonesia ol i kolim Pura Group i prininim, bai kam kamap long Pot Mosbi.

Taim ol vot pepa i kam long Pot Mosbi, PNGEC bai rausim ol pepa, pekim gen na bihainim namba bilong ol elijibel vota i stap long wan

wan distrik na provins, na skelim ol vot pepa.

“Ol wokman bilong PNGEC long hetkwata bai rausim ol pepa long ai bilong ol polisman, ol bai kaurim gen, pekim gen na bihainim namba bilong ol manmeri husat inap long vot long skelim ol vot

pepa i go long wan wan distrik na provins,” Mista Gamato i tok.

Mista Gamato i tok demokrasi bilong PNG bai no inap bagarap taim PNG Electoral Commission (PNGEC) i prininim ol vot pepa long narapela kantri.

Mista Gamato i mekim dispela

toktok bihain long olpela Gavman Printa Ken Kaia na nau Gavman Printa Christine Lenturut i tok PNGEC i no mekim gutpela disisen long prininim ol vot pepa bilong Nesanel Ileksen long Indonesia.

I go moa long pes 5...

EXPERIENCE WORLD CLASS SERVICES

CALL: 1599

Nambawan Super

WE CARE FOR YOUR FUTURE!

Nupela Gavana Jeneral tok tenkyu long Palamen

NUPELA Gavana Jeneral bilong PNG, Bob Dadae, i tok tenkyu long Palamen i gat bilip long em na i makim em i kisim ples bilong Sir Michael Ogio.

Sir Michael, husat i namba 9 Gavana Jeneral, bai risain na lusim wok bikos taim bilong em i pinis long Februeri long dispela yia.

Mista Dadae i tok em i amamas long ol pipel bilong Kabwum i makim em i kamap memba na lida bilong ol inap tripela taim olgeta.

“Mi laik tok tenkyu long ol pipel bilong Kabwum i bilip strong long lidasip bilong mi na ol i makim mi kamap memba na lida bilong ol inap 15 yia olgeta,” Mista Dadae i tok.

Mista Dadae i mekim dispela toktok long las wik taim em i laik tok tenkyu long olgeta manmeri husat i bin helpim em na sapotim em long lidasip wok bilong em,

stat long ilektoret bilong em long Kabwum na i kam long Nesenel Palamen.

Mista Dadae i tok insait long dispela 15 yia we em i bin stap memba, em i save kisim helpim long planti manmeri long kantri na em i amamas long helpim bilong ol we i bin strongim em long kisim dispela nupela wok bilong em.

Em i tok em bai mekim wok wantaim amamas na bel isi bikos dispela wok em i bikpela wok tru.

“Mi laik tok tenkyu long olgeta lain husat i bin helpim mi long politikel keria bilong mi. Ol famili bilong mi na pipel bilong Kabwum i bin sanap wantaim mi gutpela taim na taim nogut.

“Mi laik tok tenkyu long ol memba bilong Palamen i wanbel long mi kamap namba 10 Gavana Jeneral na ol i makim mi kisim ples bilong Sir Michael Ogio,” em i tok.

Praim Minista Peter O’Neill i tok amamas long Mista Dadae i kamap nupela Gavana Jeneral.

Mista O’Neill i tok em i save gut long Mista Dadae bikos tupela i wok wantaim planti yia.

“Mista Dadae em i lida bilong daunim em yet. Em i save mekim wok wok bilong Lutheran Sios.

“Mi bin save long em long moa long 30 yia. Mitupela wantaim i bin wok olsem akaunten long planti yia, na bihain long en mitupela wantaim i bin kam insait long Palamen.

“Mista Dadae i wanpela senia memba bilong Palamen. Ol pipel bilong Kabwum i gat strongpela bilip long em, na ol i makim em i kamap lida inap 15 yia olgeta.

“Dispela lidasip kwaliti bilong em i ken helpim em long mekim gutpela disisen bilong kantri taim em i kamap nupela het ov stet,” Mista O’Neill i tok.

Gavana bilong Morobe, Kelly Naru, i tok tenkyu long ol memba bilong Palamen i makim wanpela senia lida bilong Morobe Provins na wanpela pikinini bilong Momase.

“Mi laik makim maus bilong ol pipel bilong Morobe na tok tenkyu long olgeta memba husat i makim Mista Dadae i kamap Gavana Jeneral bilong PNG,” Mista Naru i tok.

Em i tok dispela em i namba wan taim wanpela pikinini bilong Morobe na Momase i kamap Gavana Jeneral bilong PNG na em i amamas long dispela.

Deputi Oposisen Lida Sam Basil i makim maus bilong ol pipel bilong em long Bulolo na i tok tenkyu tu long Palamen i makim Mista Dadae.

“Mi laik tok tenkyu long Palamen i makim Mista Dadae i kamap Gavana Jeneral. Maski tupela pikinini bilong yumi Morobe i bin resis long kamap Gavana Jeneral

tasol Palamen i bilip strong long lidasip bilong Mista Dadae na i makim em,” Mista Basil i tok.

Tasol Mista Basil i salensim em long sanap strong na mekim disisen sapos kantri i bungim sampela bikpela hevi.

“Yumi bin lukim kantri bilong yumi i bin bungim wanpela bikpela hevi long yia 2011 na 2012.

“Dispela taim, Gavana Jeneral i bin paul long mekim sampela strongpela disisen, we Mama Lo i givim tok orait long en.

“Mama Lo em i olsem Buk Baibel bilong yu. Em i gutpela sapos yu ritim na bihainim Mama Lo na sampela taim bihainim Mama Lo long mekim disisen.

“I no gutpela long Gavana Jeneral i oltaim bihainim edvais o toktok bilong Nesenel Eksekutiv Kaunsil (NEC) tasol,” Mista Basil i tok.

Kempen bai stat long Epril

ILEKSEN kempen bilong 2017 Nesenel Ilekseen bai stat long Epril 20 long dispela yia, Ilektoral Komisina Patalias Gamato i tok.

Mista Gamato i tok aninit long Ilekseen Lo, Ilektoral Komisina i gat pawa long makim namba bilong wik we Ilekseen Kempen bai kamap.

Mista Gamato i tok ilekseen kempen i ken kamap long 8-pela wik o 12-pela wik.

“Tasol long dispela ilekseen, kempen bai kamap long Epril 20 na bihain long 8-pela wik, em bai pinis,” Mista Gamato i tok.

Em i tok gavman i laik daunim namba bilong wik bilong ilekseen kempen i kam daun long 4-pela wik tasol long sevim mani.

Tasol Gavana Jeneral i sainim ol pepa pinis na Ilektoral Komisina bai no moa senisim ol deit bilong Nesenel Ilekseen.

Mista Gamato i tok taim Gavana Jeneral i opim ol rit pepa long Epril 20, Ilekseen kempen bai stap long dispela det.

“Taim bilong kempen bai go het yet long 8-pela wik inap Jun 24 na kempen bai stop,” em i tok.

Em i tok nominesen bai pas long Epril 27 na poling o taim bilong vot stret bai stat long Jun 24 i go inap Julai 8.

Gavana Jeneral bai kisim bek long rit pepa long Julai 24 na dispela bai lukim pinis bilong 2017 Nesenel Ilekseen.

K10, 000 nominesen fi bai kamap lo

PRAIM Minista Peter O’Neill i mekim pinis namba wan eksen long apim mani mak bilong nominesen fi ol kendidet bilong 2017 Nesenel Ilekseen bai baim long resis long 89 open o 22 provinsal sia.

Mista O’Neill i laik senisim Seksen 103 bilong Mama Lo long apim nominesen fi bilong 2017 Nesenel Ilekseen i go antap long K10, 000.

Seksen 103 bilong Mama Lo i tok long ol kendidet husat i laik sanap long Nesenel Ilekseen i mas baim K1,

000 nominesen fi long PNG Electoral Commission (PNGEC).

Bihain long namba tu riding bilong dispela bil, sapos planti memba bilong Palamen i sapotim Praim Minista long dispela amendmen bilong namba tu na tri riding, em bai kamap lo na ol manmeri husat i laik sanap long dispela ilekseen bai baim K10, 000 pastaim na ol i ken resis.

Mista O’Neill i tok gavman i apim nominesen fi long bringim moa mani i go insait long PNGEC na helpim ol

long mekim sampela wok wantaim dispela mani long ranim 2017 Nesenel Ilekseen.

Em i mekim dispela toktok long taim bilong las Palamen siting las wik taim em i tokaut long senisim ilekseen lo long apim mak bilong nominesen fi.

Mista O’Neill i tok ol kendidet husat i winim ilekseen bai kisim bek K10, 000 nominesen fi bilong ol.

“PNGEC bai kisim nominesen fi bilong arapela ol kendidet husat i lus na ol kendidet husat i lus bai no

inap kisim bek mani bilong ol,” Mista O’Neill i tok.

Long Februeri 1, taim Mista O’Neill i bin askim Palamen long senisim ol bilong ilekseen long larim dispela senis bilong apim nominesen fi i kamap lo, 74 memba bilong Palamen i vot long sapotim Praim Minista.

Namba bilong ol memba husat i vot egensim dispela plen bilong apim nominesen fi em i bin 14 tasol.

Taim Palamen i sindaun gen long Februeri 28, wanpela namba wan samting ol bai mekim em long kamapim dispela lo hariap.

Isten Hailans polis i redi long nesenel ilekseen

OL polis bilong Isten Hailans i wok long redi nau long mekim ol wok bilong 2017 nesenel ilekseen.

Provinsal Polis Komanda

(PPC), Alex Ndrasel i go pas long ol dispela wok redi.

Long dispela wok redi, ol plisman na meri long provins i mas wokim 6 o 8

aua eksasais na wokabout inap 25 kilomita long rot.

Long Tunde moning, moa long 200 polis i bin lusim Lahame long Unggai Bena

distrik na ol i mas wokabout long Bena plains i kam kamap long Goroka taun long 7 klok nait.

Inspekta Andrew Wawia husat i wokabout wantaim ol polis i tokim ol olsem wok bilong ilekseen bai kisim ol i go long ol ples longwe tru olsem na kain trening olsem bai mekim ol i fit long wok bilong ilekseen.

Bipo long dispela, Ekting Edministreta bilong provins, Samson Akunai i bin makim provins na givim tripela nupela 10 sita Toyota Lenkrusa long helpim wok bilong ol polis.

Long taim PPC Ndrasel i kisim ki bilong ol dispela kar, em i mekim tok promis olsem bai ol i yusim ol kar long mekim wok bilong lukautim lo na oda insait long provins.



Ol polis bilong Isten Hailans i ekseais long rot long redi long 2017 ilekseen.



Ekting Edministreta bilong provins, Samson Akunai i bin makim provins na givim tripela nupela 10 sita Toyota Lenkrusa long helpim wok bilong ol polis.

Ol senis bai helpim ol NASFUND memba

Charlpetson Koi i raitim

OL memba bilong Nasfund bai i lukim sampela senis long sait bilong infrastraksa na ol sistem long senisim ol sevis bilong ol memba na ol employiya.

Dispela ol senis bai stat long ol mun bihain.

Planti bilong ol dispela sistem bai ol i wokim long masin bai ol memba i sekim balens bilong ol na ol askim bilong ol taim ol i yusim ol smat pon bilong ol.

Planti taim ol Nasfund memba i save sanap long longpela lain long sekim balens o pulmapim ol fom bilong kamap memba, tasol nau bai ol i gat sans long mekim ol dispela isi tru yusim ol nupela senis bai kamap long Ogas.

Het bilong Nasfund Memba Sevis, Charlie

Gilichibi, i tok dispela yia em wanpela amamas taim tru we kampani bai kamapim senis.

“Dispela mun i go inap Julai bai mipela i mekim ol dispela wok long sistem na stat long kirapim long ol brens long pinis bilong Julai. Ogas bai ol memba i ken stat yusim ol dispela sevis,” Mista Gilichibi i tok.

Ol narapela ol memba long ol provins insait long kantri bai i lukim senis i kamap long ol wokflo menesmen sistem long luksave olsem ol aplikesen na ol narapela askim bilong ol memba bai i kisim helpim long taim.

Sif Eksekutiv Opisa bilong Nasfund, Ian Tarutia i tok dispela ol sevis bai i isi na gutpela taim ol i yusim ol mobil fon long kisim ol infomesen na sekim ol balens bilong ol.

Ol sevis olsem i wok hariap long ol pemen bilong ol memba na ol mani ol i save bungim, bai ol i ken yusim aplikesen bilong pon na ol onlain sevis long save long ol askim hariap tru, bai ol i kisim ol toksave o teks long pon, bai ol i stretim gut ol Kol Senta we ol no inap go sanap long longpela lain long ol brens na planti moa.

Kina bai lukautim mani bilong NASFUND

Charlpetson Koi i raitim

OL memba bilong Nasfund we i save sevim mani bilong ol long hap bai ol i protektim o sevim gut bihain long Kina Security Limitet i sainim agrimen wantaim National Supaenuesen Fan long givim sevis long lukautim mani.

Dispela em bihain long Nasfund i go insait long wanpela fainel disain na wokim ol bikpela senis long infrastraksa na ol sistem

long senisim memba na ol employiya sevis dispela yia.

Dispela em i 5-pela yia plen we Kina na Nasfund i sainim agrimen.

Ol memba bilong Nesenel Supaenuesen Fan bai i lukim sampela senis i kamap long ol sistem na ol infrastraksa.

Wanpela bilong ol senis em long luksave olsem ol mani bilong ol memba i stap gut na seif.

Sif Eksekutiv Opisa bilong Nasfund, Ian Tarutia i tok

olsem ol i givim dispela wok long Kina bikos ol i gat strong long yusim teknoloji na bai lukautim na givim gutpela sevis long ol kastoma.

“Long dispela yia, mipela i laik tingim ol memba na wokim ol senis bilong ol memba tasol,” Mista Tarutia i tok.

Sif Eksekutiv Opisa bilong Kina, Syd Yates, i tok ol i sainim dispela agrimen i soim ol divelopmen i wok long kamap na bikpela ol

sevis bilong teknoloji long fainensel sevis sekta bilong PNG.

“Kina Sekyuriti bai i lukautim olsem K4.5 milien bilong Nasfund na olsem 9 milien bilong olgeta lain i save sevim mani wantaim Nasfund,” Mista Yates i tok,

Planti senis bai i kamap yet long ol narapela ol sevis long senisim ol Senta

Dispela bai i soim olsem ol sevis bilong ol Nasfund memba bai i kamap gut nau na em bai isi.



CEO bilong Nasfund Ian Tarutia na EO bilong Kina Sekuriti Syd Yates i sainim pepa long lukautim ol memba moni bilong Nasfund.

BSP kamapim Diposit ATM

Charlpetson Koi i raitim

OL pipel long ol komyuniti long ples na ol taun husat wokim ol liklik bisnis olsem SME bai i gat gutpela rot bilong sevim mani.

Dispela bai i kamap bihain long

Benk Saut Pasifik i statim dispela Diposit Autometet Masin (ATM).

Ol i bin soim dispela long nambawan e-Bisnis ekspo bilong Benk Saut Pasifik we ol i soim long publik rot bilong yusim dispela Dispost ATM.

Dispela Diposit ATM i makim ol lain wantaim liklik bisnis tasol em gutpela long husat i save sevim mani wantaim BSP long ol mani i stap yet bihain long ol i wokim bisnis. Ol kastoma i ken luksave long dispela Diposit ATM bikos em i no

wankain olsem masin bilong rausim mani, em i gat retpla pen.

Em i gat wanpela rot bilong kisim mani tasol long putim mani em bai ol i kisim wanpela spesol kat. Taim wanpela kastoma i putim kat i go insait long masin, em bai

givim ol instraksen bilong putim ol pepa mani mak long K2 i go antap long K100.

Ol i traim yet dispela Diposit masin tasol ol i yusim nau long Haba Siti na Boroko brens long Pot Mosbi.



BSP PERSONAL LOAN

Visit your nearest **BSP Branch today to apply.**

- ✓ 100% unsecured loan
- ✓ Flexible repayment terms
- ✓ Loan up to K50,000
- ✓ Quick approval

The following branches will be open to accept School Fee Deposits **ONLY** on **SATURDAY, 28 JANUARY & 4 FEBRUARY 2017 | FROM 8:45AM - 12:00PM.**

- ✓ Boroko Branch – NCD
- ✓ Madang Branch – Madang
- ✓ Lae Market Branch – Morobe

Back to School is easy with a BSP Personal Loan..
WE ARE BSP



Ela Beach bai gat 4-pela len rot

Frieda Sila Kana i raitim

“BIKPELA malolo nambis bilong Pot Mosbi, Ela Beach bai senisim lukluk bilong en wantaim nupela divelopmen bilong rot na nambis,” Gavana bilong Nesenel Kepital Distrik, Powes Parkop i tok.

Long Fonde las wik insait long wanpela midia konprens, NCD Gavana Parkop i tokaut long divelopmen bilong Ela Beach nambis wantaim 4-pela len rot we bai i lukim ol kontrakta i skruim solwara i go bek 100 mita moa, long kamapim 4 len rot.

Kontraka China Harbour Engineering kampani bai kamapim gen Ela Beach wantaim mani mak bilong K55 milien. Mista Parkop i tok dispela mani bilong wokim ol rot long siti em NCDC i kisim dinau long Benk Saut Pasifik long mekim Pot Mosbi i kamap nambawan long kantri.

Dispela 4-len rot bai i go bung wantaim Paga Hill Ring rot na divelopmen we nau i stap pinis na tu long bungim wantaim APEC senta divelopmen long redi long bikpela miting bilong Esia Pasifik Ikonmik Kopresen (APEC) memba long 2018. Gavana i tok tu olsem taim dispela rot i pinis em bai kisim nupela nem, wankain olsem olgeta narapela nupela rot long siti.

“Siti i wok long go bikpela na em bai senis olgeta taim ol i pinis long ol nupela divelopmen. Ol bai wokim rot i go insait long we solwara i stap nau, inap 100 mita na ol bai kamapim tu nupela hap bi-

long ol famili i ken stap, pilai na malolo,” Mista Parkop i tok.

Dispela divelopmen em bilong go wantaim kamap bilong nupela na bikpela APEC senta we bai i sanap long Wes sait bilong Ela Beach. Wantaim dispela APEC haus na ol divelopmen bilong en, Ela Beach bai kamap wanpela nambawan bilas ples long Saut Pasifik.

“Yupela no ken tingting long go raun long Brisbane o Cairns o long narapela hap, bikos Ela Beach bai kamap wankain olsem ol dispela ples bihain long ol kontrakta i pinis wantaim divelopmen bilong em,” Gavana Parkop i tok.

Tasol Mista Parkop i tok i gat liklik rotblok i stap long ol kontrakta i go het bikos sampela pipel i wok long wari long ol yar diwai long nambis we ol i tok, ol tumbuna bilong ol i bin planim na ol i no laikim rot bai i go antap long dispela hap.

Dispela kain tingting na pasin bai kostim K200,000 long olgeta wan wan de sapos ol kontrakta bai abrusim ol diwai long mekim rot. Mista Parkop i tok ol dispela diwai tu i lapun pinis na ol i save pundaun nating na no gut bai kilim ol man tu.

I gat 37 diwai yar bai ol i mas katim long givim spes long wokim nupela 4-len rot.

“Sapos mipela bai kilim tupela pik olsem sakrifais bilong ol dispela diwai tu em bai mipela i mekim. Mi laikim rot bai go het. Bikpela samt-ing em ol lain i save stap long Siti i mas amamas long ol senis i wok long kamap.



Ela Beach nambis bai senis long bihain taim. Ol dispela yar diwai i stap long tumbuna taim yet i kam tasol NCDC bai katim daun long nem bilong divelopmen bilong Pot Mosbi siti. Foto: Nicky Bernard.

“Gutpela long Memba bilong Pot Mosbi Saut i stap nau long wanem em i ken painim sampela gutpela diwai na planim long kisim ples bilong ol dispela yar diwai,”

Mista Parkop i tok.

Kumul Holding na Eda Ranu wantaim wanpela narapela kampani i patna wantaim NCDC long long stretim ol wara na suris sis-

tem long kamapim dispela rot divelopmen.

Ol wok divelopmen bilong Ela Beach rot i stat pinis long las wik Fraide.

Autim tingting:

Tok amamas long Morobe man long kisim wok Gavana Jeneral. Mi foma wod kaunsila bilong Sialum LLG, Tewae Siassi Distrik, Mista Teddy Moses makim Sialum Manmeri na Tewae Siassi na Morobe pipel na mekim tok amamas i go long Gavan bilong Peter O’Neill na Leo Dion long makim Honorebel Bob Dadae long kamap nupela Gavana Jeneral.

Wantok Niuspepa em i tok pisin we mipela ples manmeri i save laikim tumas. Teddy Moses – Sialum LLG, Tewae Siassi Iektoret.

Baker: ANZ senis bai helpim PNG

Paul Zuvani i raitim

SENIS long stap na opere-sen bilong Australia Nu Silan (ANZ) Benk bai helpim Papua Niugini, long go het long wok bisnis bilong em Menesing Dairekta Mark Baker i tok.

Dispela senis em long lukim ANZ lusim wok bisnis em i save mekim long Papua Niugini we i stap aninit long nem Pasifik wok divisen long Australia yet.

Long mekim olsem em i tok i tru bisnis i gro namel long midel klas tasol long sait bilong mobail benking dispela i no kamap gut.

Long dispela as wok bisnis we i stap aninit long nem Pasifik divisen nau bai go aninit long Australia divisen.

Em i tok dispela ol

long-tem senis i kamap bihain long bipo sif eksekutiv opisa ANZ Mike Smith i pinis long wok.

“Dispela disisen i kamap bikos mipela i gat bikpela wok insait long ANZ bisnis grup,” Baker i tok.

“Tasol wankain olsem ol arapela bisnis mipela i mas sapotim ol manmeri bilong mipela, ol kastoma.

“Mipela i mas mekim olsem tu long strongim bisnis bilong mipela.

“Wanpela as em bikos long ol ples i stap longwe, wanpela em bikos long histori na narapela em bikos long longpela poroman pasin namel long Australia na PNG.

“Dispela ol kain senis i ken kamap gut tasol wantaim ANZ long PNG.

“Mi wok long lukim moa ol wanwok bilong mi i save lusim Australia na

kam long PNG long sapotim wok bilong mipela na kastoma bilong mipela.

“Long kam long PNG sapos wanpela i stap long Singapore o Hong Kong dispela i narakain.

“Mipela i laik lukim mipela i wok bisnis long PNG olsem mipela i stap yet long Australia na mekim wok.

“Olgeta dispela samt-ing em long lukim bisnis bilong mipela i mas gro.

“Em i gutpela long lukim olsem bisnis bilong mekim haus tu wok long gro na dispela i kam long gro bilong midel klas.”

Planti wok bilong benk i mekim em long wantaim ol bisnis lain tasol Baker i tok em i gat laik long mekim kism moa ol kastoma bilong ol liklik lain tu.

Wantaim midel klas em i gat kredit kad tasol i lukluk long kamapim Visa

debit kad tu.

“Ol manmeri long Papua Niugini i laik long wokabout i go i kam na ol i laik yusim mani we i isi long kisim,” Baker i tok.

Em i tok dispela nupela kad em EMV sip we em i gutpela long yusim tasol ol ATM na EFTPOS i no gat ol program we i sapotim kamap bilong EMV sistem.

Long nau ANZ i gat 15 opis brens long PNG tasol i laikim moa ol manmeri i mas joinim benk na kamapim mobail benking bai isi long wok bilong ol.

Sampela as em i ting i mekim benk i no gro gut em bikos planti hap bilong manmeri i no klia gut long rit na rait na i no save yet long yusim teknoloji.

Baker i tok sapos moa manmeri i save long yusim teknoloji em i bilip wok bisnis inap groa.

Ol Kabwum amamas long Dadae kamap Gavana Jeneral

Paulus Tali i raitim

Long wik i go pinis bikpela bung i bin kamap we ol lida bilong Kabwum i tok tenkyu na amamas long 55 palamen memba long votim, Kabwum, Memba Bob Dadae, long kamap Gavana Jeneral bilong Papua Niugini.

Wanpela lidaman bilong Sombore insait long bus eria bilong Maunten Sarawaget long Kabwum Distrik, Em Martin Fenzon husat i wokabout tupela de long Sombore bihainim Sarguwat na kamap long Lae.

Em wantaim ol lida long Lae olsem Imbong Kenny, i makim ol pipel bilong Kabwum na i tok tenkyu long Papa God.

Ol i tok amamas long luksave bilong 55 memba bilong palamen long givim namba long Hon. Bob Dadae husat nau bai kamap nupla Gavana Jeneral.

Bob Dadae i bin stap olsem Kabwum lida na em wok klostu wantaim Evanjelikal Luteran Sios Bilong Papua Niugini long kain kain wok ministri bilong sios. Em oltaim i sambai long helpim sios.

Ol lida i tok long wok bilong Bob Dadae wantaim pipel mipela Kabwum pipel lukim moa sevis deliveri kam long lukaut bilong em.

Kabwum lida Kenny Imbong i tok moa olsem em i no isi long Kabwum pipel long lusim kain lain olsem Dadae.

Oposisen laik kotim gavman long nominesen fi go antap

OPOSISEN i laik putim wanpela Suprim Kot Refrens long askim kot sapos plen bilong gavman na PNG Electoral Commission (PNGEC) long apim nominesen fi em i stret o nogat, Lida Don Polye i tok.

Mista Polye i mekim dispela tok-tok taim Palamen i laik senisim Seksen 103 bilong Mama Lo long apim nominesen fi bilong 2017 Nesanel Ilekseen i go antap long K10, 000.

Seksen 103 bilong Mama Lo i tok long ol kendidet husat i laik sanap long Nesanel Ilekseen i mas baim K1, 000 nominesen fi long PNG Electoral Commission (PNGEC).

Mista Polye i tok dispela amendmen bil long senisim Seksen 103 bilong Mama Lo i lukim 74 memba bilong Palamen i wanbel pinis long larim senis i kamap long namba wan riding long Palamen.

Em i askim ol pipel long sapatim Oposisen na rausim dispela bil long Suprim Kot bikos dispela senis em i no gutpela long demokratik kantri olsem PNG.

"Dispela bil bai rausim humen rait bilng ol manmeri long sanap long ilekseen bikos planti kendidet bai sot long mani long baim nominesen fi," em i tok.

Mista Polye i wanbel long disisen bilong Ilektoal Komisina Patalias Gamato long larim ol deit bilong 2017 Nesanel Ilekseen i stap yet.

Mista Polye i amamas long Mista Gamato i no bihainim toktok bilong Praim Minista Peter O'Neill na gavman long daunim namba bilong ilekseen kempen wik.

"Ol pipel i laik long lukim Ilektoal Komisina i mekim wok bilong em long stretpela wei na larim dispela ilekseen i kamap fri na fea inap ol i kisim bek ol rit pepa long Julai 24," Mista Polye i tok.

Em i tok Oposisen i laik wokbung wantaim na helpim PNGEC na arapela gavman ejensi i kamapim fri, fea na seif demokratik ilekseen long dispela yia.

Mista Polye i tok ol siting memba bilong Palamen i no ken apim namba bilong ol elijbel vota o manmeri husat inap long vot long vot bilong ol.



Oposisen Lida Don Polye

Ilekseen petisen fi go antap long K20, 000

GAVMAN i laik apim fi bilong Ilekseen Petisen i go antap moa long K20, 000 na Palamen i laik senisim lo bilong larim dispela senis i kamap.

Long las siting bilong Palamen, Praim Minista Peter O'Neill i tok namba tu senis gavman i laik mekim long ol ilekseen lo em long Seksen 209 bilong Ogenik lo bilong Ilekseen.

Dispela senis bai lukim ilekseen petisen fi i go antap

long K20, 000. Ilekseen petisen fi nau em i K5, 000.

Mista O'Neill i tok ol kendidet husat i lus na i laik salensim kendidet husat i win, i mas gat K20, 000 olsem sekyuriti mani long go long kot.

Gavman i laik senisim Ogenik Lo bilong Provinsal na Lokal Level Gavman (LLG) long holim bek ilekseen bilong ol kaunsil na larim LLG ilekseen i kamap bihain long 12 mun.

Long namba wan riding bilong dispela tupela amendmen bil, 74 memba bilong Palamen i sapatim Praim Minista O'Neill long larim dispela senis i kamap.

Mista O'Neill i tok senis ol i laik mekim long Ogenik Lo bilong Provinsal na LLG em long senisim tri mun i kamap 12 mun.

"Dispela bai givim sans long PNG Electoral Commission (PNGEC) i ken skruim LLG ilekseen i go long neks yia," Mista O'Neill i tok.

Mista O'Neill i tok gavman i laik skruim LLG ilekseen i go long neks yia bikos sampela LLG ilekseen long 2013 i no bin kamap gut na sapos PNGEC i ranim LLG ilekseen long dispela yia, sampela kaunsila bai no inap pinisim 5 yia taim bilong ol.

Namba tu riding na las vot long larim dispela tupela senis i kamap lo bai kamap bihain long tripela mun long Epril bipo long ol rit pepa i kam aut long na ilekseen kempen i stat.

NAQIA i muvim het opis long Pot Mosbi

NESENEL Egrikalsa Kwarantn na In-speksen Atoriti (NAQIA) het opis long Tropicana Building long Waigani Drive i muv i go nau long Six Mile.

Bod bilong NAQIA i bin mekim disisen bilong muvim opis i go long nupela hap.

Dispela nupela het opis i stap long kona bilong Morea Tobo Rot na Saraga Strit long Six Mile.

Long Trinde, papa bilong dispela nupela opis, Cindy & Roy International (PNG) Ltd i bin givim ol ki bilong opis i go long Siaman bilong Bod bilong NAQIA, Dr Vele Pat Ilaava.

NAQIA menesing dairekta, Joel Alu, Ko-pret Sevis Jeneral menesa Edwina Tago, Ekting Jeneral

Menesa Operesens Warea Orapa wantaim ol senia NAQIA opisa na ol opisa i makim Pesonel Menesmen i bin stap tu long witnessim dispela samting.

Dokta Ilaava i tok NAQIA i mekim bikipela na impoten wok bilong was long baio-sekyuriti na tred long dispela kantri na ol i mas muv i go long bikipela bilding bikos ol i nidim moa spes long mekim ol wok bilong ol na skruim moa ol wok ol i mas mekim aninit long lo.

Menesa bilong Gavman Opis Alokesen na Pablik Sevis Hausing wantaim Dipatmen bilong Pesonel Menesmen, John Gohuse, i tok kost bilong painim opis spes bilong ol Gavman dipatmen na ejensi i antap

tru. Mista Gohuse i tok dispela em i wanpela bikipela salens Gavman i wok long bungim tude, bikos rent i antap tru.

Em i tok maski rent i antap tru, Gavman bai wok yet long lukim olsem olgeta ejensi bilong en i gat gutpela opis long wok.

Mista Alu i tok bai i gat sampela liklik hevi long taim ol i stretim ol telepon na email long taim ol i muv i go long nupela opis. Em i askim ol bisnis na pablik long stap isi na wet inap olgeta wok bilong stretim nupela opis i pinis.

Em i tok olgeta wok bilong muv long nupela opis bai pinis long wiken na wok bai ran gut long kirap bilong dispela wik,



Dr Vele Pat

Mande 12 Februari. Mista Alu i tok olgeta wok bilong NAQIA bai muv i go long nupela opis tasol Import Permit seksen bai i stap yet long Waigani inap Februari 17.

NAQIA em i wanpela Gavman Stetutori Atoriti ol i kirapim aninit long Ekt bilong Palamen (1997) insait long Ministri bilong Egrikalsa na Laipstok long mekim sains-bes

na kost-efektiv baio-sekyuriti sevis long stopim ol sik nogut na ol arapela bintang nogut em ol inap long bagarapim helt bilong ol diwai na enimal bilong PNG na kamapim hevi long egrikalsa na ikonomi bilong kantri.

NAQIA i save mekim wok bilong em long ol intenesenel ples balus, bris bilong ol sip, pos opis, na ol boda bilong graun long Papua Niugini.

Sirinumu Dam papagraun laik pasim wara

OL papagraun bilong Sirinumu Dam long Sentral provins i laik pasim wara na pawa saplai bikos ol i laikim gavman i givim gutpela ansa long watpo gavman i no givim rot projek bilong putim kolta long Sirinumu rot.

Koiari Lokal Level Gavman (LLG) i go pas long stopim wara saplai we Pot Mosbi siti i save kisim bikos ol i laikim Minista bilong Woks na Implementesen, Francis Awesa, long tokaut long wanem samting i kamap long pablik tenda notis

Woks Dipatmen i bin putim long kirapim 10 kilomita rt i go long Sirinumu.

Presiden bilong Koiari LLG, Ogi David, i tok tenda bilong kirapim dispela rot i bin kamaut long yia 2014 tasol projek i no kamap hariap na ol papagrun wantaim Koiari LLG i no wanbel long gavman i wok long isi isi.

Long las wik Tunde, ol i bin givim wanpela petisen long Minista bilong Woks, Francis Awesa, tasol minista i no givim wanpela gutpela

bekim.

Dispela i lukim ol papagraun i kisim ki bilong Sirinumu Dam na pawa stesin na i laik stopim pawa na wara saplai i go long Pot Mosbi siti.

"Mipela i laik tok sori long ol manmeri i stap long Pot Mosbi siti, tasol mipela i mekim dispela eksen long tokim gavman long mekim samting stret. Mipela i nidim sevis na rot em i namba wan sevis we pipel i nidim," Mista David i tok.

Mista David i soim wanpela

pepa we Treseri Dipatmen i bin apruvim na salim K30 milien i go long Dipatmen ov Woks na Implementesen long kirapim dispela rot na givim sevis long ol pipel bilong Koiari.

"K20 milien em bilong mekim mentenens bilong rot namel long Marianville na Sogeri Nesanel Haiskul. Global Construction i bin winim tenda na pinisim dispela projek long 2014," Mista David i tok.

Em i tok K10 milien em bilong ki-

rapim Sirinumu rot na putim kolta, stat long larowari i go inap Boda (5 kilomita) na Boda i go inap Sirinumu (5 kilomita), tasol projek i no kamap, na ol papagrun nau i laik pasim wara na pawa saplai.

"Ol pipel bilong Sogeri i nidim gutpela rot na gavman i mas givim dispela rot. Mipela i les long gavman i tok promis nating na larim ol manmeri i wokabout go kam wantaim kago long dispela 10 kilomita rot," Mista David i tok.

Wok bilong las yia bai go het

KLOSTU long 80 pesen bilong ol wok program bilong Opis ov Sensasip i bai go het yet long dispela yia na 20 pesen bai nupela wok na sampela wok i no pinis long las yia.

Sif Sensa Steven Mala i tokim ol wan wan divisen long bi-hainim wok program na mekim wok.

Mista Mala i mekim dispela tok-tok taim em i tokaut long Enuel Opere-senel Plen long las wik Tunde.

Divisen ov Strateji Plening na Polisi Kodinesen i bin oge-naisim dispela lonsing.

Mista Mala wantaim Deputi Sif Sena Jim Abani, ol senia menesa na ol opisa

i bin bung long dispela taim.

"Fanding tasol bai pulim yumi bek, tasol dispela i no ken kamap ekskus. Yumi mas mekim wok na kamapim samting," Mista Mala i tok.

Em i tok wan wan divisen bai kamapim ripot long wanem wok ol i wokim gut na em i karim kaikai.

Ol bai givim ripot long wan wan kwota na givim Enuel Menesmen Ripot long pinis bilong dispela yia.

Mista Mala i tok arapela gavman dipatmen na ejensi tu i wok long bungim hat taim bikos ol tu i no gat inap mani.

Mista Mala i tok tripela eria we ol bai wok long dispela yia

em ol;

Awenes na ed-vokesi long ol isu bilong sensasip ong olgeta hap bilong kantri,

Disentralaisesen bilong o pawa bilong Sif Sensa, na Putim intanet filtering sistem.

Mista Mala i tok ol bai yusim olgeta samting bilong komyunikesen long mekim awenes long olgeta hap long kantri.

"Namba tu wok em long skelim sampela pawa bilong Sif Sena i go daun long ol provinsal na lokal level long wan wan wok," em i tok.

Namba tri wok em long glasim intanet na stopim ol samting no gut we lo bilong kantri i tok tambu long en.

Polis statim ileksen awenes long Isten Hailans

OL polisman long Isten Hailans Provins i statim pinis awenes kempen bilong 2017 Nesenel Ilekse. Isten Hailans Provinsal Polis Komanda (PPC), Sif Superintenden Alex N'Drasal, i lonsim pinis awenes kempen we ol polisman bai mekim long olgeta 8-pela distrik bilong provins.

Lonsing bilong dispela bikpela awenes kempen i kamap long Goroka long las wik.

Mista N'Drasal i tok em i namba wan samting long

ol polisman i mekim awenes na tokim ol pipel long kamapim gutpela fri, fea na transparen ileksen.

"Dispela awenes kempen bipo long ileksen i kamap bai givim ol skul toktok long ol pipel na tokim ol long ol rait ol pipel i gat aninit long Mama Lo bilong kantri," Mista N'Drasal i tok.

Em i tok ol pipel i mas amamas na ol i no ken prèt long makim ol lida bilong ol.

Mista N'Drasal i tok ol man i no ken pretim, fosim

o paitim arapela manmeri long votim ol kendidet long laik bilong ol.

"Ol mama na yangpela man, ol i mas votim lida long laik bilong ol yet. Narapela man i no ken fosim ol long votim kendidet, larim ol yet i mekim disisisen long laik bilong ol yet bikos Mama Lo i givim tok orait pinis, na ol i gat rait long votim kendidet we ol yet i laikim," em i tok.

PPC N'Drasal i tok ol ol wan wa komanda bilong

rural polis stesin bai mekim awenes kempen long wan wan distrik insait long provins.

Em i tok arapela pablik sevan, ol komyuniti lida, sios lida na arapela manmeri tu bai helpim ol polisman long mekim arapela wok na helpim wan wa wod i redi long Nesenel Ilekse.

Mista N'Drasal i tok ol polisman bai yusim ol nupela polis kar Gavana Julie Soso i baim na givim ol long mekim dispela ileksen awenes kempen.

K92 Main projek bai stat gen

Paul Zuvani i raitim

KAINANTU Gol Main long Isten Hailans bai stat gen bihain long em i bin pas 8-pela yia, sif opereting opisa John Lewins I tok.

Dispela main em Barrick Gol maining kampani i save lukautim tasol nau i salim long Kainantu (K92) Maining kampani.

Lewins i tok i luk olsem main bai stat gen long dispela Epril.

Em i tok kampani i tro-moi pinis inap olsem C\$10 milien (K24 milien) long stretim ol samting bipo long wok i stat na bai wok yet inap long olgeta opere-sen i stat.

"Main i bin stap nating 8-pela yia olgeta na sampela ol masin na samting i ros liklik tasol mipela bai klinim na statim gen operesen," Lewins i tok.

"Taim Barrick Gol i laik salim main, dispela i givim

sans long mipela (K92 Maining) long baim."

Lewins i tok long K92 Maining i gat sampela ol olpela lain long Barrick i stap wantaim ol tu na i bilip dispela i gutpela ekspiriens.

Em i tok ol i hop long mekim mani long dispela narapela mun o Epril taim main i stat gen.

Em i tok taim ol i mekim gut mani, ol i hop long putim long sait na yusim

gen long mekim eksplorasen wok taim prais bilong gol na kopa i strong gen.

Em i tok plen bilong kampani long mekim wok eksplorasen i stop bihain long prais bilong gol na kopa i go daun long 2015.

Long dispela as em i tok kampani i kisim wanpela lon long wanpela praivet kampani, Cartesian Capital, Nu Yok long Amerika long helpim ol long statim gen main.



People connecting Business People



PNG Air

CENTRAL RESERVATIONS

Phone: + 675 7222 2151 | Fax: + 675 325 4867
TOLL FREE NUMBER 16111 | Email: reservations@pngair.com.pg

Kila Kila Sekenderi skul i no inap kisim mani moa

Frieda Sila Kana i raitim

KILA KILA Sekenderi skul long Pot Mosbi Saut ilektoret long Nesenel Kapital Distrik i tokaut olsem skul bai i no moa kisim projek fi na ol narapela fi i go insait long akaun bilong skul, bihainim tok oda i kam long Minista na Seketeri bilong Edukesen.

Dispela toktok em i bin kamap long maus bilong Prinsipal, Henry Panai long taim em i bin bung wantaim ol papamama bilong ol sumatin long Sande 12 Februari long Tkatchenko miting haus bilong skul.

Mista Panai i bin gat tupela bikpela asenda long dispela taim bilong ol papamama i bung wantaim ol skul menesmen na P&C bod na komiti. Namba wan em long ol skul pait i kamap insait long skul na namba tu em long no gat skul projek fi long dispela yia.

Long toktok bilong ol pait insait long skul, Prinsipal Panai i tokim ol papamama olsem em i les pinis long pasin bilong pait olsem na wantaim wanbel



Skul miting haus bilong Kila Kila Sekenderi skul nau i kisim nem TKATCHENKO Hall bikos lokal memba, Justin Tkatchenko i putim mani long stretim lukluk bilong en. Dispela yia em bai namba wan taim long olgeta gret 10 na gret 12 sumatin inap sindaun long wanpela hap tasol na mekim eksam insait long dispela haus. *Poto: Frieda Sila Kana.*

bilong bod na bihainim tok stia bilong Minista na Seketeri bilong edukesen em i mekim disisen bilong em yet olsem em bai pinisim wanem pikinini o sumatin husat i kirapim pait long skul gen.

“Ol pikinini i save karim naip na skru draiva na ol i save go long skul, haitim na bihain kamautim long kamapim birua,” Mista Panai i tok.

Bihain long wanpela pait i kamap namel long sampela gret 10 sumatin nagret 9 sumatin skul i bin rausim pinis tupela sumatin na tripela i bin stap yet long papamama bai lukim principal. Ol papamama husat i bin stap long dispela taim tu i bin wanbel olgeta long dispela tingting bilong prinsipel Panai.

Long Trinde dispela wik,

Prinsipel Panai i bin singaut gen ol papamama bilong Gret 9 sumatin long toktok long hevi bilong pait insait long skul.

“Tok olsem ol gret 9 na 10 i pait em i giman stori. I no gat gret 9 na 10 pait. Em i pait namel long ol liklik lain tasol,” Mista Panai i tok.

Pastaim long Trinde wik antap, Mista Panai i bin singautim olgeta papa-

mama bilong ol Gret 10 sumatin long i go na stretim dispela toktok bilong pait. Long dispela taim yet ol papamama husat i bin kamap i bin sainim wanpela tok orait pepa long rausim ol pikinini husat i kirapim pait.

Long sait bilong baim ol projek fi, Mista Panai i tok ples kliia olsem em i wasim han bilong em olgeta long kisim mani moa long ol papamama, olsem na sapos husat papamama i laik baim Skul ID bilong pikinini o sampela samting olsem ol yunifom, ol i ken go nabaim long kentin we i stap aninit long menesmen bilong P&C.

Long wankain taim, ol papamama i amamas tru long lukim planti nupela senis i kamap long skul wantiam helpim bilong lokal memba na Minista bilong Spot na APEC, Justin Tkatchenko na Gavana bilong NCD, Powes Parkop

Ol wankain wok bilong senisim ol skul i wok long kamap long olgeta hap bilong Pot Mosbi Saut Ilektoret wantiam helpim bilong lokal memba na Gavana bilong NCD.

Vot pepa bai kam long mun Mas

I kam long pes 1...

Gavman printing opis i save prinim ol vot pepa bilong nesenel ileksen tasol nau PNGEC i givim kontrak bilong prinim 10 milien vot pepa i go long Indonesia.

“Larim mi tokim ol manmeri bilong dispela kantri. PNGEC i no bagarapim demokrasi bilong dispela kantri taim mipela i prinim ol vot pepa long ovasis,” Mista Gamato i tok.

Em i tok namba wan samting ol manmeri i mas save em i pasin bilong sampela ol kendidet long mekim wankain vot pepa.

Mista Gamato i tok vot pepa bilong 2017 Nesenel Ilekse i gat 9-pela sekyuriti samting long helpim PNGEC i yusim dispela pepa tasol.

“Sapos sampela kendidet i laik stilim dispela vot pepa na mekim sampela moa vot pepa long laik bilong ol yet, nau ol bai hat long mekim bikos i gat 9-pela sekyuriti samting long holim ol,” Mista Gamato i tok.

Taim bilong vot stret bai stat long Jun 24 na bai pinis long Julai 8.

Long taim bilong vot, wan wan manmeri bai yusim tupela vot pepa bilong Open na Provinsal long wan wan ples bilong vot.

Ol prisaiding opisa bai kisim bek hap bilong vot pepa na ol bai holim dispela hap pepa long sekim gen vot pepa taim ol i kaunim ol vot.

“Wan wan vot pepa i mas gat sekyuriti samting. Na dispela hap pepa we ol prisaiding opisa bai kisim na holim bai kamap olsem wanpela sekyuriti samting.

“Wok bilong mi olsem Ilektoral Komisina em long larim wan wan vota i kisim sans long makim lida. Mipela i les long paul pasin i kamap, na mipela i kamapim ol dispela sekyuriti samting.”

“Mi laik tokim ol pipel bilong PNG olsem Pura Group, husat i wok long prinim 2017 vot pepa, em i wanpela wol klas kampani.

“Mi yet i go lukim ol na mi lukim ples bilong mekim vot pepa, na mi wanbel long wok ol i mekim.”

Pura Group i save prinim ol vot pepa bilong ileksen long Indonesia na long arapela kantri tu, Mista Gamato i tok.

Em i tok ol dispela lain i save prinim mani bilong arapela kantri na nau ol i wok long mekim sim kad bisnis we ol i putim sekyuriti samting long sim kad.

NASFUND: Nupela lukluk long olpela Boroko opis

Nicky Bernard i raitim

NASFUND, fan we i save lukautim seving bilong ol wokmanmeri bilong kampani i opim nupela opis long Boroko long aste.

Dispela opis bai holim 90 manmeri long stap insait.

Long taim bilong opim NASFUND siaman Hulala Tokome i tok: “Bod long makim laik bilong ol memba i mekim bikpela singaut long Memba Sevis long 2017.

“Bihainim apgred bilong opis long Lae we inap long holim 66 manmeri, mipela i amamas olsem Boroko brens apgred bai holim moa kastoma.

“Dispela em long bihainim tingting bilong Bod olsem NASFUND i namba wan fan we ol manmeri i laik sevim mani bilong ol.

“Long dispela as mipela i mas balensim hamas memba mipela i gat na hamas mani mipela i



Smail long Kastoma Sevis Kaunta: Nathalie Wuktumi i amamas na wok long sevim ol kastoma long fran kaunta long nupela lukluk opis bilong NASFUND long Boroko. *Poto Nicky Bernard.*

mekim.

“Mipela i laik tokim ol memba olsem mani bilong ol i stap seif na i gro.

“Long wankain taim ol

memba i mas lukim olsem ol i kisim gutpela sevis long mani ol i tromoi long fan.”

Tokome i tok fan i gat planti arapela plen long

strongim stap na wok bilong em na dispela i kisim ol samting olsem apgreding teknoloji na sistem bilong em.

Em i tok stat long Ogas dispela yia fan bai statim ol nupela wok.

Long wankain taim Nasfan sif eksekutiv opisa lan Tarutia i tok bikos long ol nupela senis we bai kamap ol memba i mas lukluk long ol kain sevis olsem:

- 24 aua memba inkwairi;
- 24 bisnis aua (tripela de) long olgeta benefit peimen;
- Memba potel wantaim smatpon app na onlain sevis;
- Emploia onlain potel long mekim bikpela namba bilong ol lain husat i makim fan; peimen long onlain wantaim nogat deposit sek peimen na strongim ol arapela senta.

NASFUND i bikpela supaneusen fan long PNG wantaim 55,000 memba wantaim mani mak bilong K4 bilien long kes na ol aset.

Oil na ges industri long PNG strong yet

OIL na ges industri long PNG i wok long gro maski prais bilong oil long intanesenel maket i pundaun i kam daun na bringim hat taim long planti oil na ges kampani.

Taim prais bilong oil na ges i bin pundaun i kam daun long wol maket, planti ol kampani i wok long salim ol oil na ges fil bilong ol na i wok long isi isi lusim petroleum bisnis bikos i no gat planti mani.

Wanpela as bilong oil na ges prais i go daun em i bikos Organisation of Petroleum Exporting Countries (OPEC) i wok long paim prodaksen volium.

Taim OPEC i apim level bilong prodaksen, planti oil na ges i pulap tru, na i no gat planti baia long baim oil na ges.

Long wankain taim, Amerika i wok long apim level bilong shale oil prodaksen. Dispela i mekim intanesenel maket i pulap long oil na ges na no gat planti baia long baim oil na ges.

Maski prais bilong oil na ges i pundaun, oil na ges industri long PNG i wok long gro strong yet.

Taim PNG LNG Projek i bin kamap, prais bilong oil na ges i bin stap antap long US\$50 long wan wan barel bilong krud oil.

Tasol taim sampela LNG projek long Asia, Afrika na Yurop i pinisim konstraksen wok na i go insait long prodaksen, prais bilong oil na ges i abrusim US\$50 long wan wan barel na i kam daun olgeta.

Dispela i no stopim ol biknem oil na ges kampani olsem ExxonMobil bilong Amerika na Total SA bilong Frans long kam inves ne mekim bisnis long PNG.

Taim ExxonMobil i pinisim konstraksen wok PNG LNG Projek na statim prodaksen bilong LNG long salim long Taiwan, Saina na Japan, Total SA i kam insait long patna wantaim InterOil na statim namba tu LNG Projek.

Menesing Dairekta bilong ExxonMobil PNG, Andrew Barry, i bin tok ExxonMobil bai mekim moa driling wok long P'nyyang ges fil long Westen Provins na Muruk-1 long Hela Provins long strongim LNG bisnis.

ExxonMobil i bin tok ol i lukluk long kamapim namba tri tren bilong PNG LNG Projek na apim mak bilong LNG prodaksen.

Praim Minista Peter O'Neill i tok ExxonMobil i bilip strong long



MV Papua em i wanpela bikpela sip bilong karim PNG LNG i go long Esian maket.

ikonomi bilong PNG na dispela invesmen bilong ol long PNG LNG Projek em i wanpela gutpela samtung.

"Em i wanpela bikpela foren invesmen long kantri bilong yumi," em i tok.

ExxonMobil i laik strongim bisnis bilong em long PNG taim em i tok aut long baim InterOil wantaim PRL 15 ges fil long Elk-Antelope.

Ol bod ov dairekta bilong InterOil i wanbel long salim kampani i go olong ExxonMobil.

Siaman bilong InterOil Chris Finlayson i tok tokim ol seaholda bilong InterOil long wanbel long dispela plen long salim kampani bikos ol seaholda bai kisim mani long ExxonMobil na tu ol bai kamap seaholda bilong ExxonMobil.

Dispela plen bilong ExxonMobil long baim InterOil i soim olsem oil na ges bisnis long PNG i kamap strong yet.

Wanpela saveman bilong oil na ges, Dokta Feriedun Fesharaki, i

tok PNG em i stap klostu long Esian ges maket na dispela i wok long pulim ol biknem oil na ges kampani long kam invest long hia.

"PNG em i klostu long Saina, Japan, Saut Korea na Taiwan. Ol dispela kantri i save baim bikpela LNG long sampela kantri.

"PNG em i klostu long ol dispela kantri long Esia na dispela i pulim tingting bilong planti ol oi na ges kampani long kam mekim bisnis long hia," em i tok.

Dokta Fesharaki, husat i siaman bilong Facts Global Energy (FGE), i tok PNG i gat gutpela poroman wantaim planti ol kantri long Esia.

"Dispela poroman bilong PNG na Saina na Japan i mekim ol kantri long Esia i strongim bisnis wantaim PNG," em i tok.

Em i tok Saina i ken sampela taim senisim tingting na daunim prais bilong baim LNG tasol Japan i no save daunim prais.

"Pasin bilong Saina em i ken senis, tasol Japan bai no inap senis. Hamas ges em i wanbel long baim

long PNG, em bai bihainim dispela agrimen na tok promis," Dokta Fesharaki i tok.

Dispela saveman i tok maski oil na ges prais i go daun tasol planti oil na ges kampani bai kam insait yet long PNG long invest.

Long wankain taim, namba tu LNG Projek long Galp provins bai stat long yia 2018.

Total SA bai go pas long dispela projek.

Total SA i tok Antelope-7 ges fil long Petroleum Ritnsen Laisens (PRL) 15 long Galp Provins i wok long mekim sait trek driling.

InterOil i bin painim dispela bikpela ges fil taim pastaim siaman na Sif Eksekutiv Opisa (CEO), Phil Mulacek, i bin bosim InterOil.

InterOil Corporate, husat i projek patna bilong Total SA na Oil Search long Papua LNG Projek, i autim dispela ripot long tupela wik i go pinis.

InterOil i tok mak bilong driling long Antelope-7 i kamap long 2, 127 mita (6, 978 fit).

Ol i dril yet long painimaut hamas ges stret i stap long Antelope-7 bipo long namba tu LNG projek i kamap.

Sabsideri kampani bilong Total SA long PNG em i Total E&P PNG Limited.

Opereta bilong PRL 15, Total E&P PNG Limited, i tok ol i bungim sampela hevi long Orubadi Fomesen taim ol i wok long mekim ol driling wok long Antelope-7.

Orubadi Fomesen em i bikpela ston i stap aninit long graun na em i wok long stopim ol paip bilong driling long i go insait dambolo tru we ges i stap.

Dispela i lukim Total i mekim sait trek driling. Total i mekim sait trek driling taim bikpela ston i save dispela bikpela ston blokim rik o paip i go long graun long rausim oil na ges.

"Total i wok long mekim sait trek appraisal wel driling long Antelope-7 bihain long ol i bin painim hevi long dril i go daun moa yet," InterOil i tok.

Ol ripot i kam long Total i soim olsem Antelope-7 sait trek appraisal wel i kamapim 1, 980 mita (6,496 fit) driling long Orubadi Fomesen.

Dril bai stop long 2, 300 mita (7, 545 fit).

Ripot bilong dispela driling wok bai soim hamas ges risev i stap long Antelope-7.

Taim Total i kisim dispela ripot, ol bai mekim Fran End Ensiniaring na Disain (FEED) long statim Papua LNG Projek.

Bihain long FEED, Total E&P PNG bai askim ol wan wan kontrakta long kam mekim ol konstraksen wok bilong kirapim Papua LNG Projek.

Antelope-7 i stap 1.25 kilomita longwe long saut-wes bilong Antelope-5.

InterOil i holim 36.5375 pesen intres long Antelope-7 wel. Total E&P PNG Limited i gat 40.1275 pesen intres, Oil Search i holim 22.8350 pesen, na arapela liklik kampani i holim 0.5000 pesen intres long Antelope-7 wel.

Sapos ExxonMobil i baim InterOil, ExxonMobil bai baim olgeta sea na samting bilong kampani.

Dispela bai lukim ExxonMobil i kamap biknem oil na ges kampani long PNG na wol wantaim.

ExxonMobil i lukim olsem oil na ges industri long PNG em i strong yet na moa bisnis bai kamap long hia.

Edukesen sans i op long India

Charlpetson Koi i raitim

INTENESANEL Trening Institut i wok bung wantaim Intenesanel Edukesen Patwe program i givim sans long ol dispela sumatin i no kisim spes long ol teseri skul insait long kantri.

Dispela program i givim rot bilong edukesen long ol sumatin insait long PNG long tripela yia.

Tasol, mani i ken kamap wanpela rot bilong helpim pa-

pamama na ol spona na em i ken givim gutpela sans longol sumatin i no inap kisim long kantri.

Long dispela yia, ol i traim long apim namba bilong ol sumatin long ol teseri skul, tasol sistem i feilim planti sumatin yet.

Tasol i gat ol narapela rot long i givim ol sumatin narapela sans long skul.

Wanpela bilong dispela ol sans em long stadi long wanpela bilong ol institute bilong

Archarya Institut insait long Bangalore long India.

Edministresen Menesa bilong Intenesanel Edukesen Patwe, Grace Gebai, i tok ol eplikesen i op pinis na bai i pas long Me. Long Jun bai ol sumatin i go long wankain taim bikos ol nupela long hap husat sumatin i kamap bihain olsem tripela mun, bai no gat sans bilong en long go het.

Tasol, Ps Grace i tok mani bilong baim skul fi bai i kamap wanpela bikpela hevi tasol ol

spona na ol papamama i ken sapotim ol sumatin long kisim gutpela edukesen.

“Dispela bai i givim sans long ol Gret 10 na 12 sumatin i no gat spes long pinisim skul long PNG. Ol gret 10 i ken go stadi long pri-Yunivesiti bihain ol i ken go long yunivesiti long India. Skul fi em K60, 000 we bai i karamapim tripela yia.

Olsem total bilong 16 sumatin long PNG i skul i stap long Archarya Institut insait long dispela program.



Wanem iekonomik sistem i orait long PNG?

Dispela iekonomik sistem we yumi stap long em i wok olsem lata bilong haus. Planti pipel i laik stap antap tasol ol i mas stat long namba wan step em i stap daunbilong long graun. Sampela i save laki na ol i stat klostu long namel. Olgeta taim ai bilong yumi i save lukluk long dispela ples antap we yumi laik stap long en na yumi traim hat tru long go antap long ol step ya.

Yumi tingim olsem antap long dispela ples wok em i isi bikos planti arapela manmeri bai i mekim wok na yu no inap hatwok planti. Yumi save tingim olsem bikos yumi stap antap pinis olgeta samting bai i kam isi tasol; naispela haus, naispela kar, skul fi bilong pikinini i no moa wari bilong yumi bikos ol arapela bai i wari long em na poket bilong yumi bai i pulap tru long mani. Nau laip em bai i isi.

Long Mosbi yumi lukim liklik lain tasol ol i stap antap pinis tasol biklain yumi traim hat yet.

Yumi long PNG yumi gat wanpela sistem we ol famili na klen i save stap namba wan long sindaun bilong yumi. Olsem na olgeta taim yumi taitim bun yumi save yumi mas lukautim famili na klen tu.

Tingim bipo taim pasin bilong karim wok bilong indai na marit i bin narakain. Bipo taim skul em i sut long pasin bilong lukautim ol pipel long ol ples. Tude skul em i sut long kisim save bilong stap insait long dispela iekonomik sistem bilong ausait lain olsem na skul fi em i save antap tru.

Husat i save karim dispela ol hevi? Yumi save lukluk long dispela brata o susa i stap antap pinis.

Olsem na maski dispela man o meri i ting em i orait pinis, planti taim em i save sotwin. Taim em i pinis long dispela laip bilong stap antap em i save go bek long ples na em i stap wankain gen olsem ol pipel bilong em.

Planti taim yumi lukim dispela man o meri husat i stap antap pinis i amamas tasol ol pikinini i mas stat go antap long ol step ya gen bikos ol i bin stap insait long amamas na i no luksave olsem ol i stap insait long driman bilong mamapapa tasol.

Dispela iekonomik sistem i mekim yumi dri-man planti na ting olsem gutpela sindaun i hangamap long mani tasol na i hangamap long laip we famili na klen i no gat mining.

PNG i nidim wanpela sistem we inap lukautim olgeta pipel bilong em. Dispela ol i stap long amamas bilong mani na dispela ol i sotwin long go antap long dispela lata ya. Pasin bilong ol tumbuna bipo i bin karamapim olgeta pipel bilong em na i lukautim olgeta gut olsem wanpela i no stap arasait.

Nau long dispela taim em i taim bilong mani na olsem wanem tru PNG inap bungim dispela sistem bilong mani na pasin bilong ol tumbuna na kamap wantaim wanpela nupela rot bilong PNG stret.

Ol fama i yusim graun bilong ol long bringim mani i go bek long ol ples, ol bisnis bilong ol arapela ples i kam tekova long ol liklik bisnis long ol taun na siti. Yumi lukim nau tupela sistem i gat sans long wok bung tasol mani sistem i wok long tekova nau long ol liklik bisnis long PNG na yumi sakim famili na klen i go long sait.

Kuman laik tok pait wantaim Polye

Paul Zuvani i raitim

EDUKESEN Minista Nick Kuman i askim Oposisen Lida Don Polye long kamap wantaim gutpela edukesen plen sapos em i ting tiusen fi fri (TFF) polisi bilong dispela gavman i no wok.

Em i mekim dispela tok bihain long Polye i rabisim wei gavman i wok long ranim TFF polisi.

Polye i tok dispela polisi i no wok bikos planti ol provins i bungim hevi long em.

“Ol klasrum we bai mas gat 40 sumtin nau i go antap long 60 na 70 sumatin long wanpela klasrum,” Polye i tok.

“Dispela i no inap long kamapim kwaliti edukesen we Dipatmen i toktok long kamapim.

“No gat ples bilong ol sumatin i sindaun na rait, no gat leboratori, no gat haus bilong ol tisa, no gat inap ol klas-



Nick Kuman, Edukesen Minista. Laik tok pait wantaim Oposisen Lida Don Polye.

rum na no gat mentenens long ol haus i stap.

“Ol meri prinsipel i slip long domitori bilong ol meri bikos ol i mas givim spes long ol nupela tisa husat i go long skul.”

Em i tok gavman i kamapim hariap TFF polisi wantaim no gat gutpela wok painim long wanem samting i mas stap bipo long polisi ken wok gut.

“Long tok TFF i wok gut, dispela i giaman. Polisi pundaun na i no wok.”

Tasol Kuman i tok stat long 2012 we Gavman i kamapim TFF polisi, em i yusim inap K3.3 bilien mani long sapotim polisi.

Em i tok long olgeta dispela yia gavman i givim mani long ol skul na i no save long wane-mas Polye i tok polisi i no wok.

“Mi askim Polye sapos em i gat gutpela plen orait em i mas tokaut,” Kuman i tok.

“Sapos i gat sans mi bai kisim long tok pait wantaim em.

“Mi no wanpela tisa tasol las 4-pela yia mi stap (Edukesen Minista), mi save long wanem samting Edukesen Sekta i mas gat.

“As tingting bilong O’Neill Dion gavman em long lukim ol manmeri bilong Papua Niugini mas gat save bilong rit na rait.

“Dispela em polisi bilong Gavman na ol edukesen opisa wantaim ol tisa i mas lukim

polisi i wok.”

Kuman i tok dispela yia gavman i tok orait long K62 milien long TFF polisi.

Long namba wan tem Edukesen Dipatmen bai givim K75 milien.

Em i tok las wik Dipatmen i putim pinis K53 milien i go long akaun bilong wanwan ol praimer na sekendari skul.

Long tumora Fraide em bai putim K22 milien long akaun bilong ol elementari na disten edukesen skul.

Kuman i tok TFF polisi i gat tripela komponen o hap.

Dispela ol hap em Edministresen o Kes komponen we mani i go stret long ol skul, infrastraksa em we lokel memba i mas helpim wantaim mani long kamapim ol klasrum, haus tisa na ol arapela samting na Karikulum na Risos Metiriel aninit long Tisa Risos komponen.

Las tupela hap em wanwan skul i mas raitim projek proposel na givim long ol lokal memba long fanim.

Long dispela Kuman i tok em i no lukim gutpela as long Polye i tok TFF polisi i no wok.

Konstraksen i no kamap long taim

Charlpetson Koi i raitim

YUNIVESITI bilong Papua Niugini (UPNG) i bin lukim sampela senis i bin kamap long las tripela yia, tasol, ol dispela divelopmen i no kamap long taim bikos i no bin gat inap mani.

Yunivesiti Iven Menesmen na Pablik Rilesen Dairekta, Jim Robins, i tok dispela ol bilding, gavman i bin wokim tasol no gat mani na ol i stopim wok.

Dispela Yunivesiti i bin kamapim planti human risos taim em i stat long 1960s.

Planti divelopmen i kamap long olgeta hap na UPNG i isi long divelop.

Long wanem, mani em i bikpela hevi tru long kirapim

konstraksen bilong Sains bilding 4 na nupela skul bilong Lo we wok i no kamap inap nau.

“Gavman i bin givim mani long wokim dispela ol bilding tasol bihain ol i bin skelim go tripela hap na putim long tenda. Dispela tu i bin wokim na kisim longpela taim tru,” Mista Robins i tok.

Long wankain taim, wanpela agrimen namel long gavman bilong Australia na PNG i kamapim tripela nupela bilding insait long UPNG.

Ol tripela bilding em, Sumatin Sevis bilding, wanpela nupela Leksa Tieta na Skul bilong Bisnis na Pablik Polisi.

Mista Robins i tok dispela Sumatin Sevis bilding bai i pinis long pinis bilong 2017



Ol lain long trening long Goroka Provinsal haus sik i kisim sampela teknikal instraksen i kam long wanpela teknisen bilong Wol Helt Ogenaisesen (WHO) long taim bilong lonsing bilong HINARI woksop long Goroka long Tunde dispela wik. Poto: Loutova Siapea.

WHO kamapim HINARI woksop long Goroka

Loutova Siapea i raitim

Wol Helt Ogenaisesen (WHO) i go pas nau long kamapim HINARI woksop long Goroka Provinsal Haus sik long Isten Hailans.

Na ol patisipens husat em o l helt wokas long Goroka haus sik bai i ken

lainim na kisim save long joinim na kamapim network i go long ol rimot etpos na helt senta we ol helt wokas long dispela ol longwe ples bai i ken kisim gutpela helt na medikal infomesen long provins, PNG na wol tu.

Dispela wan wik woksop bai pinis long Fraide (tumoro).

Ol asples bilong Goroka i no wanbel long nupela EHPHA

Loutova Siapea i raitim

Ol asples manmeri bilong bikpela Kama hauslain long Goroka, Isten Hailans i no wanbel long nupela Sif Eksekutiv Opisa (CEO) bilong Isten Hailans Provinsal Helt Atoriti (EHPHA) na ol i bin holim wanpela protes long soim belhevi bilong ol long Tunde dispela wik.

Kama hauslain i bosim 75 persen (75%) bilong Goroka taun, na olsem ol papa bilong graun we bikpela Goroka Provinsal Haus sik i stap antap long en, ol

i no amamas long bod bilong EHPHA i makim man long narapela provins olsem CEO bilong EHPHA.

Kama viles komyniti lidaman Samson Walizopa long taim bilong protes i tok, taim EHPHA i bin kirap o ol lain husat i stap long antap atoriti i no bin makim wanpela man asples long kamap olsem CEO na ranim EHPHA i kam inap long stat bilong 2016 yia i go pinis, bod i bin makim Joshua Soso husat em i pikinini Kama yet long kamap olsem Ekting CEO we em i bin ranim EHPHA i kam inap long De-

semba 2016, bod i bin kisim kot oda long muvim em i go aut long opis.

"Mipela i no amamas long dispela makim bilong CEO, long wanem, sapos autsait ol man o meri long narapela provins i kam na ranim EHPHA, ol bai tingim interes bilong ol yet na i no nap ranim gut EHPHA. Olsem na mipela ol pipel bilong Kama na Isten Hailans laikim olsem dispela makim bilong CEO em i no bihainim na i kam long stretpela pasin", Walizopa i tok.

Em i tok sapos bod i bin makim ekting CEO Joshua Soso long i go

antap na kisim opis bilong pemenen CEO, em bai gutpela, long wanem, em asples man bilong Kama na tu em i gat namba na masta digri bilong bisnis edministresen (MBA).

Long dispela gutpela save we em i greduet na pasaut long UPNG wantaim MBA digri, Mista Soso emi namba wan man we em i ken ranim EHPHA wantaim dispela gutpela save we em i gat long en.

"Mipela bai protes na pasim olgeta dua long EHPHA opis sapos nupela CEO i laik i kam na statim wok", Walizopa i tok.



Ol patisipens wantaim ol representative bilong Wol Helt Ogenaisesen (WHO) i sanap na kisim poto bihain long lonsing bilong HINARI woksop long Goroka Provinsal Haus sik long Mande dispela wik. Poto: Loutova Siapea.

Edukesen ken promotim meri

Lorraine Basse i raitim

senisim tingting ol man i save gat long ol meri long PNG.

Profesa Sinabare i tokim moa long 500 meri na sampela man husat i bin bung long 2017 Hailans Rijon Womens Forum long UoG, Goroka, i sten Hailans long las wik olsem em i laikim gavman long mekim planti nupela polisi long helpim ol mama na yangpela meri.

"Yumi i bringim save na ekspirens bilong yumi long wan wan wok yumi save mekim na wan wan ples yumi save stap long en," Profesa Sinabare i tok.

Em i tok planti taim ol lo na polisi gavman na ol i da i save mekim long kantri i no save helpim ol mama na yangpela meri.

"Sapos wanpela samting i

stap long givim strong long ol meri, em i edukesen tasol. Edukesen em i wanpela pawaful samting we i ken givim strong long ol meri.

"Sampela ol polisi gavman i mekim i hat long promotim ol meri. Edukesen em i wanpela ki samting we i lukim olsem em i i ken bringim gutpela senis i kam long laip bilong ol pikinini meri," em i tok.

Profesa Sinabare i tok tok tok bilong promotim meri long PNG i bin stat long taim tasol gavman i mekim liklik wok.

"Bihain taim bilong ol meri i ken senis na ol meri i ken kisim gutpela samting bihain long dispela bung.

"Wanem samting yumi toktok long dispela bung i ken givim sampela gutpela tingting long gavman na ol i

ken mekim sampela nupela polisi long helpim na promotim ol meri," em i tok.

Dispela bung i bin toktok long givim moa sans long ol meri i ken sanap long politiks na kirapim bisnis.

UoG wantaim US Embesi. Dipatmen ov Rilijon, Yut na Komyuniti Dvelopmen na PNG Tribal Foundation i bin holim dispela bung.

Ol meri i soim ol kain kain stail klos we ol Papua Niugini meri i wokim long save na tingting bilong ol yet



(Namel foto) Ol meri werim bilum dres i wokabaut wantaim disaina bilong ol bilum dres long PNG em Florence Jaukae bilong Isten Hailans. Mis Jaukae em i strongpela meri we i bin go pinis long New York, USA long putim ol klos bilong em long maket. Dispela Fesen pareid i bin kamap long las yia. Foto: Nicky Bernard



UN SDG Yut sempion, Raylance Mesa i go long New York long nem bilong SDG gols.

PNG yut i go long UN Yut ECOSOC Forum

Wanpela yangpela Papua Niugini i bin go long wanpela Yunaitet Nesens Ikonmik Sosel Kaunsil (ECOSOC) Yut Forum o miting long New York, Yunaitet Stets ov Amerika.

Bikpela tingting bilong forum em long wok bilong yut long rausim poveti na long promotim prosperiti o gutpela sindaun insait long wanpela wol we i save senis na long toktok long wanem kain we ol yut i ken mekim wok strong long ol 2030 Ajenda bilong Sastenebel Dvelopmen.

Yut deliget em Ms. Raylance Mesa we Yunaitet Nesen long Papua Niugini i bin makim em olsem Yut Sempion bilong Sastenebel Dvelopmen (SDGs) long las yia bikos long ol wok bilong en insait long ol komyuniti long Morobe Provins. Ol wok bilong em i karamapim ol hevi bilong klaimet senis i go long edukesen. Em i bin lusim

PNG long go long New York bihain long indaksen kos bilong en we UN PNG opis i bin givim. Ol UNFPA i sapotim wokabaut bilong en.

Raylance i bin autim ekspirens bilong Papua Niugini wantaim Gol 2 bilong SDG: Fud Sekyuriti na sastenebel egrikalsa, na Gol 13: Klaimet Senis. Em i stori long ol ples long Pasifik na em i wanpela bilong ol deliget long Forum i kam long Pasifik rijon. Bikpela samting em i lainim long dispela Forum em long pawa bilong ol yut olsem ol sens ejen.

"Forum i strongim bilip bilong mi long ol yangpela jeneresen olsem ol bai mekim bikpela wok long mekim ol SDG gol i kamap tru. Long kamapim wanpela kantri, planti lain moa i mas wok wantaim gavman. Tingting bilong SDG em long no ken larim wanpela man i stap baksait, yumi no

ken lukdaun long yumi yet na yumi olgeta i mas wok bung wantaim long go het long divelopmen ajenda bilong yumi," Mis Mesa i tok.

Em wantaim tripela narapela UN Yut Sempion bilong SDG, Raylance i gat plen long skulim ol narapela lain long komyuniti bilong em long ol i mas tokaut long ol gol na bihainim long mekim wok.

Yunaitet Nesens long Papua Niugini i bilip olsem ol yangpela pipel i bikpela patna long bringim gutpela sneis long ol komyuniti na long kantri.

"Papua Niugini em i yangpela kantri we klostu 30 pesen bilong populesen i stap namel long krismas 10 na 24. Ol dispela yangpela lain i gat strong na inap long mekim kain kain samting. yumi mas yusim ol yut." Mista Roy Trivedi, UN Residen Kodineta long Papua Niugini i tok.

Ileksen plen bai yusim K400 milien

NESANEL Lojistiks Plen (NLP) bilong ranim 2017 Nesanel Ileksen bai yusim K400 milien gavman i skelim na givim long PNG Electoral Commission (PNGEC) long Nesanel Baset bilong dispela yia, Ilektoral Komisina Patalias Gamato i tok.

plon long plenim wok bilong mekim wantaim transpot olsem balus, kar na sip.

"Mi amamas na bili bikos PNGEC i bin ranim 8-pela ileksen na dispela em i namba 9 nesanel ileksen long kantri."

"Mipela i gat save na ekspirens long ranim dispela

ileksen wantaim sapot Sif Seketeri na ol gavman ejensi."

"Wantaim sapot bilong wan wan gavman ejensi, mi bilip mipela i ken kamapim wanpela gutpela ileksen long dispela yia," Mista Gamato i tok.

Mista Gamato i tok

PNGEC i bin kamapim dispela plen wantaim sapot bilong Australian Civil Corp na i pinisim dispela plen gut tru na i redi long yusim long dispela ileksen.

Em i tok dispela plen i stat wok na NLP bai lukluk long bikpela samting olsem vot wei bilong karim vot pepa

na balot bokis, deit na taim bilong vot na arapela plne bilong ileksen.

"Displea plen i kamapim ol samting PNGEC bai mekim wantaim sapot bilong ol wan wna gavman ejensi na ol sekyuriti fos long sapotim ileksen."

"PNGEC i no inap long

NIUS NABAUT

ranim dispela ileksen long strong bilong em yet. Gavman sapot em i namba wan samting.

"Gavman ejensi olsem Dipatmen ov Fainens, Treseri na Nesanel Plening i mas wokbung wantaim PNGEC na sapotim mipela long ileksen wok olsem fanding."

Lotu bilong Holi Spirit i opim Don Bosco Akakedmik Yia

Pater Angel Sanchez sdb i raitim

EDUKETIV Pastoral Komyuniti bilong Don Bosco Teknikal Skul long Gabutu i opim Akademik Yia 2017 wantaim lotu bilong Holi Spirit, insait long Kurongku Haus miting long 10 Februari 2017.



Bisop ilek wantaim Pater Angel i givim Holi Komunio long ol sumatin.



Ol sumatin insait long Kurongku haus bung long Gabutu.

Pastaim Provinsal Supiria bilong Salesians, na nau Bisop ilek bilong Daiosis bilong Keremam, Peter Baquero SDB i bin go pas long holim lotu. Bisop ilek Peter i tokim ol DBTS skul komyuniti long ol i mas opim yau bilong ol long harim singaut bilong Holi Spirit long laip bilong ol.

Em i tokim ol tu long wok strong long karim laik bilong God i go insait long dispela akademik yia.

Ol singsing grup bilong sampela gret 12

sumatin i bn wokim lotu i kamap nais moa. Moa long 1000 boi i singim kwaia wantaim 75 ol tisa na wokman na wokmeri i helpim ol long singim ol lotu singsing we Rekta bilong DBTS, Pater Savio Angelo S. Sanchez sdb i bin raitim bilong dispela taim yet.

Insait long Kurongku Miting haus long fomol program Rekta i tok welkam long olgeta DBTS komyuniti. Em i tokim ol sumatin olsem ol i laki tru long stap insait long DBTS famili. Em i tokim olgeta long

save olsem DBTS em i wanpela Katolik, Salesien Skul na Pemited Teknikal Skul.

“Yupela i mas mekim DBTS olsem wanpela ples we i save welkamim yu na redim ol yut long laip bihain, na em i peris we i save autim gutnius, na wanpela pilai graun we ol pren i bung na amamas wantaim,” Em i tok.

Long ai bilong Rekta, olsem papa bilong komyuniti, nupela prinsipel, Martin Dai wantaim ol tisa, wokman na wokmeri na ol sumatin i autim

Tok Promis bilong Komitmen bilong ol.

Wanpela nupela sumatin, Clayton Pat-sik, i tok em i pilim nais long dispela skul. Em i amamas long lukim ol wan skul bilong em i werim gut yunifom bilong ol.

“Mi kam long DBTS bikos mi harim olsem dispela skul i save gat gutpela disiplin,” Emmanuel Bosing, wanpela ilektrikel sumatin bilong Industrial Teknikel Kos i tok.

Emmanuel tu i laikim gutpela ples long skul, bikos em i

wanpela bilong ol sumatin we i save slip insait long Bosco Haus, na em i pilim gutpela long i gat taim long pre na stadi long nait.

Tommie Tomscoll Kaekae i bin wanpela sumatin bilong DBTS. Dispela yia em i kam bek long Alma Mater bilong en olsem wanpela tisa. Em i lukim ol senis i kamap long skul na long ol ples i raunim skul na em i tok, Boskonim spirit em i stap laip yet.

“I gat bikipela wok bung wantaim i stap na rispek namel long ol tisa na sumatin,” em i tok.

Bung bilong ol meri long Hailans i kamap gut

BIKPELA bung bilong ol meri long Hailans rijon i bin kamap long Goroka i pinis nau na i gat sampela rekomendesen bin kamap.

Namba wan – I mas gat wanpela lain bilong ol man yet na narapela lain bilong ol meri yet, long taim bilong vot long nesanel ileksen long dispela yia. Namba tu – Hap namba bilong ol poling opisa i mas ol meri. Namba tri – kirapim bek wok bilong Nesanel Kaunsil bilong ol Meri.

Moa long 500 meri na ol man tu long ol 7-pela Hailans provins i bin stap insait long dispela bung long Yunivesiti bilong Goroka.

Embasada bilong USA long PNG, Catherine Ebert-Gray, i strongim gen toktok bilong Strongim Nek bilong Yumi Wantaim; namel long ol patna ogenaísesen na netwok bilong ol lain i bin kamap long dispela forum.

Em i tok pawa bilong olgeta i bung wantaim i strong moa long pawa bilong wanpela tasol. Em i tok sapos yumi wok bung bai yumi inap long kamapim senis.

Long dispela yia, US Embasi i wok bung wantaim Dipatmen bilong Komyuniti Dvelopmen, Yut na Relijon na wantaim Tribal Foundation long kamapim dispela Hailans Forum bilong ol meri we ol man tu i bin kamap, long Goroka.

I bin gat planti toktok i kamap long nesanel ileksen na long ikononi bilong kantri. I bin gat ol liklik woksop i toktok long komyunikesen skil, helt, Wimen in Politik na wanem samting i kamap gut long Pasifik na kra i bilong ol meri long politik.



Embasada Catherine Ebert-Gray i tok tenkyu long olgeta lain husat i bin kamap long 2017 PNG Wimens Forum long Hailans rijon.

Oliyo opim nupela haus bilong pasto

Paulus Tali i raitim

NUPELA haus na arapela samting olsem gaden yumi mas givim i go long God, olsem Tenkyu ofa.

I no long taim i go pinis long dispela yia 2017 long Malahang, Pasto Offo Oliyo bin opim nupela haus bilong wanpela lida bilong komyuniti, Bob Gitu em bilong Tapen na Morobe.

Ol lain famili bilong Tapen i kam long Hanta, Nadzab, Malahang Yet na Busu long witnesim na sapotim wantaim ofa bilong ol.

Long dispela taim Pasto Oliyo i autim tok bilong God na tok laip bilong yumi manmeri bilong tude yumi save tingting long laip bilong yumi tasol. Tasol Pasto Offo tok long laip bilong yumi, oltaim yumi mas luk luk i go long Bikpla Jisas husta em i rot na laip. Laip bilong yumi gat kain kain hevi na wari em tasol save givim bel isi na amamas long laip bilong yumi olsem na nau yu lida i gat haus bilong slip em bikpla samting.

“Nau insait long

haus tasol bai yu na famili slip na tok tenkyu long laip bilong yumi wan wan long gutpla taim na taim nogut em oltaim save stap wantaim yumi”, Pasto Offo i tok. Em i tok planti salens long Kominiti lida long pasin bilong yumi i no ken lukluk tumas long samting bilong dispela graun we bai em i no inap helpim laip bilong yumi stap longtaim.

Pasto Oliyo tok moa olsem long laip bilong yu yet oltaim yumi mas tingim bikipela long taim nogut na

gutpela taim bai em stap wantaim yumi. Yumi yet i no stretpela long bikpla tasol long daun pasin bilong yumi yet na givim bilong yumi, God bai inap long blesim yumi nau na oltaim oltaim.

Komyuniti lida Bob Gitu tok tenkyu long pasto. Em i tok, “Yu autim tok bilong God em helpim mi na ol famili bilong mi bai mipla slip long haus na save olsem mipela i no ken moa wari planti long samting bilong displa graun. Bikipela samting em mipela i mas tingim

olsem mipela em piksa bilong Bikipela Jisas na oltaim mipela no ken pudaun long bilip mipela gat. Long bilip tasol bai inap strongim Kristen laip bilong mipela nau na oltaim oltaim.”

Ol Tapen Kristen iamamas tru long lukim haus bilong lida nau em pinis na ol bai i go insait na slip long em. Ol Tapen Kristen i amamas na paitim kundu na singim tok bilong God na preisim nem bilong Bikipela Jisas, ol tok long yu tasol na mipela stap tenkyu long lukaut bilong yu”.

Pop: Stap sain long givim hop long manmeri husat i givap

POP Francis i askim ol Kristen manmeri long stap olsem hop bilong ol arapela olsem i gat wanpela man husat i save laikim yumi oltaim.

Em i tok maski i gat hevi Jisas husat i Bikipela i dai long sevim mipela olgeta na husat i save askim Papa God long marimari long mipela.

Pop Francis i mekim dispela askim long taim em i tingim Aposel Pol husat long taim bilong em i save strongim tingting bilong ol bilip manmeri long ol i mas sanap strong na no ken givap taim hevi i kamap.

Em i tok taim ol i mekim olsem ol i stap olsem lait bilong ol arapela bilip manmeri husat i no strong.

Long wankain taim em i tok nogat long pasin bilong no laikim ol arapela manmeri bikos ol i liklik lain bikos long skin, kala, bilip na long rijon ol i kam long em.

Long ol Kristen manmeri em i tok dispela i ejens long bilip bilong ol.

Em i mekim dispela tok long taim em i bung tu wantaim Anti-Defemesin grup, oganaísesen

we i save bung wantaim Pop long Vatiken II (1962 – 1967).

Dispela grup stat long 1913, “i kamap long pasim ol pasin nogut we ol manmeri i save mekim long ol manmeri bilong Israel na long lukim ol i stap gut na stap isi wantaim ol arapela manmeri.”

Long wanpela intanet websait, ADL i pait egensim ol manmeri wantaim lo na pasin bilong ol long bagarapim na daunim ol arapela manmeri.

Ol tingting, toktok na pasin nogut i egensim long lo bilong Yunaitet Nesen na sivil rait grup.

Long toktok bilong em Pop Francis i tok maski ol manmeri i kisim save pinis, dispela pasin nogut bilong daunim na rabisim narapela i stap yet.

Em i tok ol manmeri i mas yusim olgeta rot long daun kain pasin nogut.

“Pasin bilong givim luksave na lukautim wanpela samting i laip bilong man, dispela em bikipela samting,” Pop Francis i tok.

Nau i taim bilong skelim gutpela na nogut bilong TFF



orait 20 pesen i mas go long sanapim ol klasrum na arapela samting bilong ol skul. Ating planti papamama i kirap nogut long harim dispela nius long maus bilong Minista. Ol i no save o l s e m memba bilong ol i mas mekim ol dispela samting

sampela risets i kamap long fri edukesen na wanem kain gutpela o nogut dispela polisi i kamapim o nogat? Dispela em sampela askim yumi mas save bikos bai i gat narapela bikpela senis i kamap gen long edukesen kurikulum long ol praimer skul. Gavman na o save-man bilong en i wok long redim ol buk na ol samting bilong helpim ol tisa long yusim Standard Base Edukesen na rausim dispela sistem ol i yusim nau, Outcomes Based Edukesen. Ol tisa i redi long dispela nupela wei bilong skulim ol pikinini o nogat? Bai i gat inap buk bilong ol pikinini i yusim long lainim samting aninit long dispela nupela sistem o nogat?

long skul. Ol pikinini i go fri long skul na kantri i lukim tu olsem planti pikinini tru i wok long go long skul. Tasol bihain long faivpela yia bilong fri edukesen, ai bilong ol papamama i op na ol i luksave nau olsem dispela polisi bilong gavman i wok long bagarapim edukesen bilong ol pikinini bilong PNG. Planti pikinini tumas i sindaun long ol liklik klasrum na i no inap skul gut. Ol i sot long spes na i no gat inap desk na wanpela tisa tasol i no inap long kontrolim na skulim gut 60 pikinini long wanpela liklik klasrum. Ol papamama i no inap mekim wanpela samting long helpim skul

Mobeta yumi tingting gut na plen gut long edukesen bilong ol pikinini bilong yumi. Ol samting i no save kamap nating. Man i hatwok na i lukim gutpela kaikai. Edukesen tu i gat ol hevi na papamama i mas karim sampela hevi tu sapos ol i laik lukim kwaliti edukesen bilong pikinini. Larim ol i baim skul fi o projek fi bilong helpim skul bilong ol pikinini. I no gat wanpela samting long dispela graun i fri. Edukesen tu i wankain. Sapos yumi laik lukim kwaliti edukesen, orait yumi as redi long baim fi tu. Planti papamama bai amamas long givim mani long helpim edukesen bilong pikinini bilong ol.

DISPELA fri edukesen (TFF) polisi bilong nesenel gavman i wok long givim bikpela hetpen long ol skul insait long kantri. Planti komplek i kamap long dispela fri edukesen polisi bikos mani i no save kamap hariap long ol skul.

Na mak bilong mani ol i skelim i go long wan wan skul i no inap long mekim gut wok bilong ranim skul long wanpela ful yia. Las yia planti skul i bin sot na sampela i pasim skul bipo long skul yia i pinis.

Gavman i tokaut olsem long dispela wik bai em i skelim K75milien bilong fri edukesen mani i go long olgeta skul insait long kantri. Tasol planti skul i save ol bai i no inap long kisim dispela skel bilong ol hariap, o bai skel bilong ol i sot we namba bilong ol pikinini i bikpela tumas na mani ol i kisim bai i no inap helpim ol.

Edukesen dipatmen na nau Minista bilong Edukesen yet i mekim strongpela toktok i go long ol skul long no ken sasim skul fi o projek fi. Ol i tok save long ol papamama i mas ripot sapos skul i sasim fi na bai ol het tisa i kisim mekim-save.

Fri edukesen em i wanpela gutpela tingting bilong gavman bilong helpim ol famili long salim pikinini i go skul. Long taim gavman i statim dispela program ol papamama i amamas bikos ol i no inap wari tumas long painim mani bi-

long skul. Ol pikinini i go fri long skul na kantri i lukim tu olsem planti pikinini tru i wok long go long skul.

Tasol bihain long faivpela yia bilong fri edukesen, ai bilong ol papamama i op na ol i luksave nau olsem dispela polisi bilong gavman i wok long bagarapim edukesen bilong ol pikinini bilong PNG. Planti pikinini tumas i sindaun long ol liklik klasrum na i no inap skul gut. Ol i sot long spes na i no gat inap desk na wanpela tisa tasol i no inap long kontrolim na skulim gut 60 pikinini long wanpela liklik klasrum.

Ol papamama i no inap mekim wanpela samting long helpim skul

bikos gavman i putim tambu long baim projek fi. Planti skul i save yusim projek fi long sanapim moa klasrum o haus bilong tisa o mekim ol arapela wok bilong helpim skul. Tasol nau dispela rot i pas olsem na ol skul i kisim bikpela taim tru.

Long dispela wik, Minista bilong Edukesen i tokim ol pablik olsem wok bilong sanapim ol klasrum em i bilong wan wan memba. Em i tok mani ol memba bilong Palamen i kisim long divelopim ilektoret, i mas go tu long sanapim klasrum, haus tisa na ol arapela samting bilong skul. Em i givim eksampel olsem sapos memba i kisim K10milien long wan yia,

insait long wan wan ilektoret.

Sampela memba i ting sapos ol i baim wanpela trak o bas o wokim wanpela klasrum, em inap na wok bilong ol i pinis. Em i krangki tingting. Wan wan yia ol i kisim planti milien Kina long mekim wok long ilektoret. Sapos ol i mekim stret wok bilong skelim mani bai ol ilektoret i lukim gutpela kaikai long ol skul na ol pikinini i ken kisim kwaliti edukesen tu.

Olsem na yumi mas askim nau, kantri i kisim wanem kain gutpela helpim long disepla TFF polisi bilong gavman. Kwaliti bilong edukesen i orait o nogat? I bin gat

Nogat tisa, sumatin no gat save

SKELIM wanpela i laik pikinini bilong em i kisim save o stap nating?

Planti manmeri bai tok ol i laik pikinini bilong ol i mas kisim save.

Long dispela mipela i tok tisa stap na sumatin kisim save. No gat tisa, sumatin no gat save.

Long wik i go pinis na dispela wik mipela i harim Edukesen Minista Nick Kuman na Seketari bilong em Dokta Uke Kombra i mekim disisen long rausim ol tisa husat i sasim fi.

Kuman i tok i gat olsem moa long 1000 tok save i kamap long opis bilong em long ol skul i sasim fi long 2017.

Na em i gat ol opisa long ol wanwan provins long bihainim dispela ol toksave na salim dispela ol opisa



long mekim wok painim sapos dispela ol tok i tru.

Sapos i tru em bai saspenim ol tisa.

Tasol mipela i laik skul i stat tripela wik i pinis na nogat promis tiusen fi fri (TFF) mani i go long akaun bilong ol yet.

Ol skul i nidim mani long operet na no gat mani, ol i no inap long stap.

Long dispela as ol i mas painim mani long sapotim stap bilong ol.

Olsem mipela i askim Mista Kuman na Dokta Kombra long ol i mas tingting gut bipo long ol i rausim

ol tisa.

Ol tisa i save mekim bikpela wok long skulim ol pikinini long kisim save na wankain taim i stap olsem papamama bilong ol pikinini.

Long yia planti taim pikinini i stap wantaim tisa na i no papamama.

Long skul pikinini i lain long wanem samting i tru, gutpela na i stret.

Mipela i tok i no ausa bilong ol skul na tisa. Em polisi bilong gavman na gavman i mas lukim olsem polisi i kamap tru wantaim sapot bilong mani.

Long Tunde dispela wik Minista Kuman i tok wan wan skul i mas gat 1000 sumatin tasol em i no save olsem bikos long TFF polisi bilong em, planti pikinini i enrol long ol skul na dispela i abrusim namba em i tok long em.

Planti sumatin em namba bilong ol i antap long 2500.

Long dispela as mipela i askim Kuman wantaim seketari bilong em long go long wan wan skul na kaurim ol pikinini.

Ol bai kirap nogut long hamas sumatin i stap long skul.

Las yia planti skul i pas hariap bipo long taim tru bilong pas bikos ol i nogat mani bilong operet.

Dispela long wanem Dipatmen i no save givim mani stret long taim na long mani mak ol skul i askim long em.

Mipela i tok asua i stap long Gavman na i no opisa (tisa) olsem na mipela i askim Dipatmen long bringim bek ol tisa em i saspenim.

Tisa stap na pikinini kisim save, no gat tisa pikinini no gat save.



Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea
Telephone: (675) 325 2500
Fax: (675) 325 2579
Email: editorial@wantokniuspepa.com

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Veronica Hatutasi

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Boreboa Praimeri laik save long rot bilong kisim skul infrastraksa mani

Paul Zuvani i raitim

BOREBOA Praimeri Skul long Nenesel Kapitel Distrik i kisim buk pensil bilong lain long mani mak bilong K16,000 long Treid Pasifik las wik.

Dispela bai helpim ol tisa long tis gut na ol skul sumatin long lain gut.

I gat sampela moa ol samting skul i mas kisim na dispela i stap long mani mak bilong K10,000.

Boreboa Praimeri Skul Bod Siaman Peter Pete i tok dispela em i no tiusen fi fri (TFF) skul komponen we Edukesen Dipatmen i givim mani long em long dispela yia.

Em i tok dispela mani Dipatmen i tok i no go yet long skul.

Em i tok wok bilong Gavman i givim mani long Treid Pasifik long givim samting long ol skul i pinis bihain long 2014 na 2015.

Ken Raga, senia menesa wantaim Treid Pasifik i tok long 2016 kampani i stat long wok wantaim wan wan skul long mekim oda na givim mani we kampani i ken givim aut ol skul lening metiriel long ol skul.

Wantaim kampani em ol Edukesen opisa long Nenesel Dipatmen, Nenesel Kapitel Distrik na sampela papamama i kamap long lukim.

Tasol long taim bilong kisim sumatin bai sain wantaim ol papa-



Ol skul sumatin, papamama, tisa wantaim mausman bilong Treid Pasifik na NCD Edukesen Divisen opisa i sanap long kisim poto wantaim ol lening material skul i kisim. Foto: Paul Zuvani

mama long soim em i tru ol skul i kisim dispela ol samting pinis.

Boino Karo husat i makim Edukesen divisen long Nenesel Kapitel Distrik i tok TFF skul metiriel komponen i wanpela bikpela hap bilong polisi long kamapim kwaliti eduksen.

Em i tok taim dispela komponen i nogat, planti ol sumatin i no inap long lain gut.

"Papua Niugini i laikim sosaiti we ol i save long rit na rait," Karo i tok.

"Mipela i laik dispela i mas kamap na Dipatmen i wok hat long em yet.

"Inap olsem tu (2) milien mangi i stap pinis long skul.

"Dispela em bikpela namba i winim namba bilong ol manmeri long sampela Pasifik Ailan kantri.

"Long givim gutpela skul na save long kain namba we sampela skul i stap long bus ples, dispela i

bikpela wok," em i tok.

Em i amamas na tok tenk yu long Treid Pasifik long givim ol samting i go long ol skul.

Long bekim Boreboa skul bod siaman Peter Pete i tok skul i gat 2419 sumatin las yia skul na long TFF mani i kisim K486,900.

Tasol em i tok dispela mani yet i no inap long sapotim ol long ol samting skul i mas stretim o kamapim long em.

Em i tok TFF mani dispela yia i no go yet long akaun bilong ol.

Em i tok ol i harim TFF i gat tripela (3) hap o komponen we i gat bilong edministresen em ol skul i kisim long lip mani.

Tasol long infrastruktsa na Karikulum na Risos Metiriel mani, dispela ol i no save wanem hap em i stap.

"Mipela i laik save mani bilong dispela ol komponen i stap we?" Pete i askim.

"Mipela i gat ol tisa husat i nogat haus bilong slip, sampela klasrum i nidim meintenens, banis bilong skul na skul laibreri wantaim ol arapela samting i bagarapa na mipela i mas stretim o kamapim dispela ol samting.

"Sapos mani bilong dispela ol hap i stap, soim mipela long rot bilong aplai na kisim dispela ol mani.

Sape na Wilson strongim wok bilong Wantok niuspepa

Lotouva Siapea i raitim

WOK bilong painim na raitim nius na em i no isi.

Na long salim ol niuspepa long ol strit tu em i no isi. Na dispela emi samting we i kamap long

tupela wokman bilong Wantok Nius em Sape Metta na Wilson Apio.

Metta husat i bilong Savaiviri hauslain long Malalaua distrik, Galp provins i save wok olsem wanpela gutpela fri lens

nius ripota bilong Wantok Nius we em i save mekim dispela wok long raitim na ol jenerel na spots nius long Goroka na Isten Hailan, taun na provins we em i bin i stap long las 40 yia.

Em i bin statim wok olsem stringa long 1986, na bihain long 31 yia, em i go het yet long mekim dispela wok we em i save laikim tumas long en wantaim Wantok Nius.

"Mi i no bin kisim trening o skul long kamap jenelis o niusripota, tasol bikpela brata bilong mi leit Jack Metta husat em wanpela senia jenelis i bin givim tingting na skulim mi liklik long raitim nius, samting we em i save laikim long mekim long ol yangpela man na meri (jenelis sumatin) long taim ol i save kamap na mekim ol prektikal wok long ol opis we em i save wok long en".

Metta (Jack) bihain long em i bin greduet wantaim diploma bilong jenelis i bin statim wok olsem redio jenelis wantaim Nenesel Brodkasting Komisn (NBC) nau Nenesel Brodkasting Korporens long mid 1970's.

Na bihain em i bin wok raun liklik long ol arapela midia kampani olsem Wod Pablising, mama kampani we i save pablisim Times ov PNG, Wantok Niuspepa, Ragbi Lig Nius, Wiken Spots na Nu Nesen kala megesin.

Emi bin wok tu wantaim Post Courier na laspela kampani em i bin wok long en em National Niuspepa we em i bin wok wantaim dispela kampani inap em i pas awe long Desemba 2011.

Bihain long 31 yia, dispela narapela Metta (Sape) husat i developim ol skils bilong raitim nius i lukluk long wok strong long raitim na failim planti moa jenerel nius i go long Wantok Nius na tingting em i stap tu long kamapim sampela gutpela senis long ol wok ripot bilong Wantok Nius we em i ken bringim dispela niuspepa kampani i go long narapela level.

Nau yet narapela wanwok bilong Metta em

long sait bilong strit sels Wilson Apio bilong ples Merieka long Ifiyufa long Goroka tu i winim pinis sampela yia long wok olsem ejent long salim Wantok nius long Goroka.

Apio i bin kisim dispela wok long taim leit Fr Jim Franks i bin i stap olsem menesa bilong Wod Pablising Kampani.

Em i bin statim wok long 1985 na wok i go inap long 1997 long taim em i bin sanap na ron long nenesel ileksen long dispela yia.

Bihain long ileksen, Apio i lusim dispela wok wantaim Watok Nius na i go wok long Monpi kopi kampani.

Tasol bihain long 10-pela yia emi lusim dispela kampani na i go bek long olupela wok bilong em olsem ejent bilong strit sels bilong Wantok Nius long Goroka.

Taim Wantok Nius i askim em long wanem as na em i go bek long dispela olupela wok bi-

long em olsem ejent, em i tok taim em i bin statim wok long strit sels long 1985, em i salim ol pablisikensen olsem Wantok Nius, Times ov PNG na bihain independen Nius, Ragbi Lig Nius na Wiken Spots.

"Taim mi statim wok na salim dispela ol niuspepa, bel bilong mi i kirap tru, long wanem, dispela ol niuspepa i save pulim laik bilong planti ol papamama na ol yangpela tu. Na sels long dispela taim em i gutpela tru we em i helpim na sapotim mi tu long ol liklik mani mi save mekim olsem komisn long wok bilong mi," Apio i tok.

Em i tok, em i amamas tu long wok wantaim ol lain olsem leit Fr Jim Franks, leit William Koton, Anna Solomon na Veronica Hatutasi.

Dispela ol lain i bin mekim gutpela pasin bilong wokbung na ol i bin ranim gut kampani.



Sape wantaim Wilson husat i strongim Wantok Niuspepa long Goroka.

Madang pipel mas senisim pasin



Sir Peter Barter wantaim ol boi long strit i helpim long klinim arere bilong Madang Distrik Kot haus.

Mathew Yakai i raitim

WANEM kain man olsem wanpela man husat i bin wanpela politisen bipo na bikpela bisnis man o meri inap long daunim em yet i go daun long klinim ol rot bilong wanpela taun?

Sir Peter Barter, bipo Madang gavana na strongpela bisnis man long Madang em i wanpela man husat yumi ken tingim em olsem em i kain man we i save daunim em yet tru long level bilong ol manmeri nating long strit.

Wantok Niuspepa ripota long Madang, i lukim Sir Peter i wok long katim ol longpela gras arere long kot haus bilong Distrik Kot long Tunde dispela wik wantaim mobail mowa bilong en. Ol boi bilong em i wok long

kisim ol pipia na putim long liklik masin mowa bilong en we i save ran wantaim batri. Dispela em i no fes taim long Sir Peter Barter i mekim dispela kain wok.

Ol pablik i save lukim em i wokim dispela kain klinap em yet o wantaim ol narapela lain, planti taim. Ating sapos olgeta lain i save stap long Madang i ken stop long komplem long ol politisen na senisim pasin bilong ol bai Madang taun i kamap gut olsem Sir Peter i mekim na mekim Madang taun i kamap naispela gen.

Yumi mas putim wanpela lek i go pas long senisim pasin na tingting bilong yumi. Em i bikpela problem long Madang na tu long ol narapela taun bilong PNG we i gat planti bus na pipia nabaut.



Sir Peter Barter – Man bilong daunim em yet i ranim liklik kar bilong em long pikim pipia.



Ol boi bilong Sir Peter Barter i kisim pipia na putim long ol bek.

Lons bilong nupela book



Man i raitim buk, menesing Dairekta bilong IPA na Papua Niugini Embeseda bilong Asia Pasifik Koporesen (APEC) Mista Ivan Pomaleu.

Shirley Gar i raitim UPNG Jenelisim sumatin

MENESING Dairekta bilong Invesmen Promosen Autoriti (IPA) na Papua Niugini Embeseda bilong Asia Pasifik Koporesen (APEC) Ivan Pomaleu i lonsim nupela buk bilong em Long Sande 12 Februari 2017.

Dispela buk taitel bilong em, "My Life My, Country, My Church" i wanpela buk we i kamapim gutpela tingting, we i lukim planti famili memba, wan lotu, wan wok na frens i kamap long dispela taim. Minista bilong Fainens na memba bilong Tari Pori Open insait long Hela Provins i bin

katim ribon long makim opening bilong lonsing. Long liklik toktok bilong em, em I tok, "Jesus christ tasol em ensa bilong olgeta saksas insait long laip." Long dispela buk, mista Pomaleu i stori long olupela skul de bilong em, laip na wok bilong em. "laip bilong mi stap

raun namel long famali, wok bilong mi na sios bilong mi," em i tok. Em i stat raitim dispela buk long 2010 na pinisim long dispela yia 2017. As tingting long raitim dispela buk em long givim hop i go long planti manmeri husat i stap long ples na ol yangpela manmeri i wok lo

kam antap isi isi. Mista Pomaleu i tok tu olsem man we i kirapim tinting bilong em long raitim dispela buk em Mista Ako em wanpela raita tu na raitim moa long 4-pela buk pinis. Dispela buk bai stap long Sentrel Waigani, Women in Bisnis stol namba 26.

NIUS NABAUT

Lupari wanbel long Ilekseksen plen

Sif Seketeri Isaac Lupari i tok Nesanel Lojistiks Plen (NLP) bilong PNG Electoral Komisina (PNGEC) long ranim 2017 Nesanel Ilekseksen em i wanpela gutpela plen we gavman i ken yusim long ranim arapela ol ilekseksen long bihain taim. Mista Lupari i tok PNGEC wantaim helpim bilong Australian Civil Corp i kamapim dispela NLP na em i wanpela gutpela na stailpela plen we i nidim sapot bilong arapela gavman ejensi na seyuriti fos long larim em i karim gutpela kaikai. Em i tok PNGEC i bin kamapim NLP bihain long gavman, ol bos bilong wan wan gavman dipatmen, arapela stekholda na pablik i toktok long sampela ol asua i save kamap long taim bilong ilekseksen. "Gavman i tokim PNGEC long kamapim wanpela plen long larim ilekseksen i kamap long gutpela wei we PNGEC i ken yusim liklik mani na sevim sampela mani," Mista Lupari i tok. Em i tok ol i bihainim Pablik Fainens Menesmen Ekt long kamapim dispela plen. Mista Lupari i tok ol ilekseksen long bihain taim i ken bihainim dispela plen long menesim ilekseksen na ranim gut nesanel ilekseksen.

"Em i namba wan taim stret PNGEC i kamapim dispela kain plen, na mi laik tok tenkyu long Ilektral Komisina Patalias Gamato i soim gutpela lidasip taim em i kamap nupela ilektral komisina." "Ilektral Komisina i nidim sapot bilong yumi olgeta, na mi askim olgeta gavman ejensi long helpim em na ol wokman bilong em long ranim gut dispela ilekseksen." "I no pablik sevan tasol; sapot mask am long komyuniti na sios tu wantaim. Sapos yumi no sapotim Ilektral Komisina, em bai no inap kamapim fri, fea na seif ilekseksen wantaim liklik mani." Mista Lupari i tok olgeta lida long nesanel na lokal level i mas stap isi na sapotim wok bilong PNGEC long larim ilekseksen i ran gut na karim gutpela kaikai. "Olgeta lida long wan wan level i mas lus tingting long wanem kain sik ol gatnamel long ol yet, na i mas sapotim Ilektral Komisina long givim yumi gutpela ilekseksen risalt," Mista Lupari i tok. "Sapos yumi tingting karangi, dispela kain karangi bai no inap helpim ol pipel bilong yumi long bihainim Mama Lo na vot long



Sif Seketeri Isaac Lupari (namel) wantaim Ilektral Komisina Patalias Gamato (raithan) na Komisina bilong CS, Michael Waipo.

taim bilong ilekseksen; karangi tingting bai bagarapim ilekseksen na bai bringim planti pasin no gut olsem braiberi na paul pasin." "Long dispela as, mi laik askim yumi wan

wan lida long wan wan level long stap bak-sait long Ilektral Komisina na givim em olgeta sapot em i nidim long mekim wok long dispela ilekseksen."

STORI BILONG TUMBUNA



Stori i go olsem, long wanpela staim wanpela man wantaim meri bilong em tupela i go long kisim kapiak long bikbus. Na man i tok long meri: Yu go antap. Tasol meri i tok long man: Yu go antap. Na man i go antap tru long het bilong diwai na mekim save long kisim kapiak i stap.

Na meri i sanap long graun na i lukim wanpela muruk i kam na em i bihainim em i go tru long bikbus na i kamap long wanpela raunwara. Na em i kisim wanpela stik na i paitim wara i bruk i go hap hap, na tupela i go long ples bilong muruk. Na man ya i kisim kapiak pinis na em i tokim meri long mumutim kapiak i go hipim long wanpela hap.

Tasol meri i no bekim. Na em i kam daun na i lukim lek bilong muruk wantaim meri i go insait long bikbus. Na em i bihainim i go na i kamap long raunwara, na i kisim stik tupela i paitim long en.

Em tu i paitim na wara i bruk na em tu i bihainim i go long ples bilong muruk. Na muruk ya i go senisim skin bilong muruk na i kamap olsem man. Na em i kisim

meri ya na tupela i go planim mami long gaden. Man i bihainim tupela i go antap long ples bilong ol na em i lukluk raun long ples. Na em i lukim wanpela bikipela haus tambaran. Na em i lukim ol kain kain skin bilong ol pik, dok, muruk, snek, na ol kain kain skin bilong ol enimal.


Na em i kam ausait na i go long wanpela haus na em i lukim wanpela lapun meri i stap. Na em i kisim paia long en na em i mekim bikipela na i laitim haus tambaran, na em i go bek gen long kukim kapiak em i kisim long en.

Na ol man i planim mami, skin bilong ol i hat nogut na ol i salim meri ya i go kisim wara. Tasol ol-geta wara i drai pinis. Nau meri i kam bek gen long gaden na em i lukim ol man ya i dai pinis.

Na em i go bek long ples na i lukim haus tambaran i paia. Na em i go bek long man bilong em. Tupela ya i kukim kapiak, na tupela i kaikai pinis na i go long ples. Em tasol.

Gambiamu Minjwan
Maprik / Sepik

Em nau! Ol pikinini i ken painim rot i go long ples wantaim wantok lain...



PAINIM WOD PILAI

R S V G R N T E L R S E F N R P A T R N
K H P S E L D M R N E M A G X
F L M L N N S I A D F E H G E N K R R K

- | | | | |
|----------------------|----------------|---------------|-------------------|
| Ol wod lista: | PURPUR | KOPI | GAM |
| | BIKROT | AVEN | AS |
| STIRIM | SINGLIS | BROSIM | KARIS |
| MARMARI | WINKEL | TULTUL | STRETPASIN |
| ROT | OFER | PLENIM | HEVI |
| KUMURERE | NEK | JUN | DOTI |
| SMOK | LOTUIM | MAU | BUKOL |

E F O P M X N M F T R D L G O S O A R N E C B S I
E F O X M S E P R Y J R U N C F A F R S O T D W Y
W C I T N Z T P S Y M M B T E I E L M Q M J N A M
N A I I O G E G W O Y T E H E D S R B I L E O I J
Y P P F E Y Z O S S H F E A N S O N U O V E C R P
J E F S D G M J R R A R A S N R C T K A R I S S K
A P C I I A Y F T Q M D O M S E O U I L J H N O P
I Z A D C I O O T S I S L T X L B L P T O U M F E
G S X H Y E V Q X V E W O O G S E T W L E S N C F
I G W S D N A O R B D A J E P K S U V I E I T T T
S B N I S E X S S F K I A E N U S L R G S N V A E
A A A B M I N I H T N S G I A M R A S A T G I F M
W E N X E C A C G X I J W S E U M P P S E L E M L
I V M H T N J P S E N R B I K R O T U H D I C C N
Q M N B E D O U E C B F I S A E E I O R T S Y G D
F Y H G D I A S A J U R K M N R V C O L Y E Q K E
E G P P T W S D A L U I O G T E T F Y S D Y E G H
S D R H R O U K O O E P P S H I K M L X E T T O E
M S E A D A R I P T U S I L I J T P P M T B W W R
V E F T Z H S N X M C P A G A M A U E N S H P N F

XYH DOS KE X E E Y M G A N W T S W K H J R Y
R X P Y E N O J O N N F F K O A H L I B N S H L M
R E P D H Z R B X R P C G C S G T M A I S C P E U
G O A I C S E S E U T E N O V I B A D K K O N L G
N T I E D G E M T T N O S L M R I T P T L A K I C
I N M P U H A O S X D F G W A N P E L A I Q J R P
K U Y M S E G S D E B S G Y V I O S K U N S G A T
H T O M A J E I E R E R E S I T A S N I I Z L M
L C I W R C E D G I M P P I C K A N I S M L S A H
M O C T M O P S I O B I K E S V I D A U N S Q I X
G S N O S E S H F N E N E L L I M E O N L R E R M
E D G S N E X A D F A D D A I O F R Y D P M C D D
S G V C L L E A S H A I T I Y A S I L O I H N N
I E O X I D A L I K U M U A B W P U C C I X S P P
O H X Y E O I T Z Z K S H R C R P X S N O S C A E
Q E N I A U G J P S A T E T T F H S O Q E P W C E
R X O O P E R H A K T T T I C R L R T O E S U M
A N N Y P M O N A D U F C Y S T N D L I O P N P M
R M E L D I M F S G S P M C I Y L L E C E S S D F
E N H E E E O F E T C Z X T E C E J I R Q G N Q V

Ansa bilong Wod Pilai isu 2212



TOK PISIN NEWS

from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

PNG loya i helpim refuji long kot



Ol polis long Jacksons Intensenel ples balus long Pot Mosbi.

Australia na Papua Niugini i no ken rausim nating ol asailum sika long Manus ditensen senta taim ol loya i wok long lukluk yet long keis bilong ol asailum sika na ol refuji.

Loya bilong ol asailum sika na refuji, Ben Lomai i mekim dispela toktok bihain long sampela PNG imigresen opisa i bin rausim wanpela

asailum sika bilong Nepal long las wik Trinde.

Mista Lomai i tok, ol i bin kisim dispela asailum sika na bin putim em i go long Pot Mosbi we ol bai putim em long balus na salim em i go bek long Nepal.

PNG Imigresen opis i save tok bipo olsem ol i wok long redim rot bilong salim 163 ol asailum sika em ol i bin painim

olsem ol i no refuji tru i go bek long ol kantri bilong ol.

Mista Lomai i tok em bai putim eplikesen i go long kot long stopim dipotesen bilong ol dispela asailum sika.

Em i tokim Radio Australia olsem, em i wok long painim yet dispela man bilong Nepal, sapos em i stap yet long Pot Mosbi o ol i rausim em pinis long PNG.

Ol Tasmania fama laikim Vanuatu woka

Caroline Tiriman i raitim

Klostu nau na sampela wokman-meri bilong Vanuatu bai go wok long hortikalsa industri long Tasmania, bihain long bikipela askim bilong ol fama long Tasmania.

Leba Dipatmen bilong Vanuatu i wok wantaim stet gavman bilong Tasmania, wantaim Dipatmen bilong Foren Afeas na Tred bilong Australia bilong stretim rot bilong Vanuatu i

salim ol pipel bilong en i go long Tasmania.

Tingting bilong salim ol Ni-Vanuatu long go wok long Tasmania i bihainim tu raun bilong Minista bilong Leba bilong Vanuatu na Komisina bilong Labor, Lionel Kaluat i go long Tasmania long mun Novemba 2016.

Planti Ni-Vanuatu i stap wok pinis long ol narapela stet bilong Australia, olsem Kwinslan, Saut Australia, Viktoria na Westen Australia aninit long Pacific Seasonal Workers Scheme.

Australia na Nu Silan i helpim gut Pasifik

Caroline Tiriman i raitim

Komisina bilong Leba long Vanuatu i tok, ol Pasifik woka skim em Australia na Nu Silan i gat wantaim ol Pasifik kantri i save helpim gut tru ol ikononi na pipel bilong rijon.

Lionel Kaluat i mekim dispela toktok taim planti moa Ni-Vanuatu i redi long go long Nu Silan long mun bihain long wok aninit long Recognised Seasonal Employer o RSE skim.

Australia na Nu Silan i bin statim ol dispela

program long helpim ol Pasifik pipel i wok long Hortikalsa industri long kisim mani long helpim ol famili bilong ol.

Mista Kaluat i tok, stat long taim ol Ni-Vanuatu i save go wok long NuSilan tenpla yia i go pinis, kantri na ol pipel i lukim pinis planti gutpela samting i kamap.

Sampela kantri olsem, Fiji, Kiribati, Papua Niugini, Solomon Ailan, Tonga, na Tuvalu i save wok long dispela tupela kantri aninit long ol Pasifik woka skim.

Australia i helpim Famili PNG long daunim vailens

Caroline Tiriman i raitim

Operesen Manesa bilong Famili PNG i givim bikipela tok tenk yu long gavman bilong Australia long helpim wok bilong ol long daunim hevi bilong jenda bes vailens long kantri.

Denga llave i mekim dispela toktok bihain long sapot em Australian gavman opisa long Lae i bin givim taim lain bilong PNG Business Coalition for Women na Famili PNG i bin sainim wanpela tok orait

long wok bung long mekim dispela wok long Lae long Trinde.

Aninit long Pasifik wimen program bilong en, Ausralia i save helpim planti lain ol meri long kamap olsem ol lida, na tu long daunim ol hevi olsem domestik vailens long Pasifik rijon.

Papua Niugini, wankain olsem ol narapela kantri long Pasifik na long wol husat i gat bikipela wari bilong famili na seksual vailens.

Famili PNG i save kisim tu sapot i kam long Childfund PNG.

Ol Hela lida i wok long bringim bel isi

PNG Hela Komyuniti Gud Eksen Forum i wok long mekim yet ol wok ol i bin kirapim long 2013 long provins.

Hela i bin hap bilong Sauten Hailans Provins, inap em i kamap nupela provins long 17 Me 2012.

Ol wok bilong statim dispela LNG projek i stap tu insait long Hela Provins, i bin stat long 2008 long taim Hela Transition Authority i bin go het tu long ol wok bilong kirapim nupela provins bilong Hela.

Edministreta bilong Hela Komyuniti Gud

Eksen Forum, James Komengi i tok i bin gat ol bikipela traibel pait long provins we 85 pipel i bin dai.

Em i tok long 2013, ol i kirapim dispela Hela Komyuniti Gud Eksen Forum bilong helpim ol pipel long komyuniti long stretim ol hevi bilong LNG Projek, kamapim bel isi na ol kain kain hevi long provins.

Mista Komengi i tok ol planti vailens na kriminal pasin long provins i kamap bikos, ol atoriti i bin wari tasol long dispela LNG projek na i no bin lukluk long hevi bilong ol pipel long komyuniti.

Trabel long Hela bai no pinis inap sevis i kamap

Sam Seke i raitim

Wanpela komyuniti lida long Hela Provins i tok ol kain kain pait na trabel long provins bai i no inap pinis inap gavman i luksave long as bilong ol kain kain hevi insait long provins.

James Komengi, husat i go pas long Hela Community Good Action Forum i mekim dispela toktok taim ol polis i mekim wanpela program bilong ol pipel i givim ol gan i kam bek long han bilong ol polis.

Dispela program bilong givim ol gan long han bilong polis, bai pinis long 23 Februari, tasol Mista Komengi i tok i kam inap nau, ol pipel i givim tupela hai-pawa gan, wanpela bruk



Ol polis i wok i stap long Hela Provins.

bruk faktori gan na ol hommad gan tasol long polis.

Mista Komengi i tok as bilong ol hevi long provins em i no gat ol sevis - na i no ol gan.

Em i tok bikos i no gat ol gutpela sevis i stap, ol pipel i baim o wokim ol dispela iligal gan bilong givim ol pawa

long kisim wanem samting ol i laikim long komyuniti.

Mista Komengi i tok polis operesen i mekim olgeta vailans long provins i stop nau, tasol em i tok hevi bai stap yet inap ol i stretim as bilong en.

PNG fri skul i no wok



Poto i soim 2015 Universal Children's Day long PNG.

Lo bilong Tution Fee Free (TFF) edukesen long Papua Niugini em i wanpela samting bilong lap long en, long wanem em i no wok.

Dispela em toktok bilong wanpela mama na het tisa long Christ the King Katolik Praimeri Skul long Lae, Misis Celyne Yep. Em i tok mani nesenel gavman i save givim i no inap long ranim na lukautim ol skul.

Em i tok tu olsem, bai gutpela sapos ol papamama i helpim long baim skul fi long wanem dispela mani bai helpim long ranim ol wok bilong skul.

PNG gavman i bin statim fri skul fi long 2012, tasol em i no wok gut, long wanem planti skul i no save kisim mani i kam long gavman.

Long 2016, Christ the King Katolik Praimeri Skul i bin

kisim tasol K9000 taim em i bin wet long kisim K70,000.

Misis Celyne Yep i tokim Radio Australia olsem gavman fri skul fi i no wok.

I gat sampela nius i kam long PNG olsem ol i pulim kalabusim sampela tisa long Hailans rijon long wanem ol i wok long kisim mani i kam long ol papamama husat i laik helpim ol pkinini bilong ol long skul.

Ol bom bilong US kilim ol Afgan pipel



Ol kar i bagarap long taim wanpela bom i pairap long Sarere na kilim 7-pela pipel.

Wanpela ripot bilong Yunitet Nesens (UN) na ol lokal nius tu, i tok moa long 18 pipel i bin dai long Helmand provins long Afganistan bihain long ol balus bilong USA i bin bomim long dispela hap. Planti bilong ol lain i dai em ol meri na pikinini.

Ripot i tok ol balus i dropim bom long Sangin distrik long las wik Fonde. Pait i save strong tru long dispela hap bilong Afganistan.

Dispela em i namba wan ripot bilong ol bom ol balus bilong USA i dropim na i kilim ol sivilien long Afganistan bihain long Donald Trump i kamap presiden. Tupela wik i go pinis, i bin i gat ripot tu bilong ol balus bilong USA i dropim bom long Yemen na kilim planti ol sivilien tu.

Ripot bilong UN i tok long 9 na 10 Februari, ol intenesenel militeri fos i bin dropim bom long Sangin distrik long

Helmand provins we ol

birua bilong gavman i bin stap. Tasol ripot i tok ol dispela bom i bin kilim 18 man-meri, planti bilong ol em ol meri na pikinini.

Brigadia Jeneral Charles H. Cleveland, mausman bilong intenesenel kolisen, i tok ol balus bilong USA i bin bomim Sangin inap 30 taim olgeta las wik.

Em i tok ol i mekim wok painimaut nau long lukim sapos i tru olsem ol sivilien i bin dai long dispela taim ol balus bilong USA i bin dropim ol bom.

Ami bilong Afganistan i no mekim wanpela toktok long dispela ripot. Tasol wanpela mausman bilong gavman, Najeeb Danesh, i tok wanpela deligesen bilong Difens Ministri i wok long sekap long dispela ripot.

Haji Ahmand, husat i save stap long Sangin, i bin kam long Kandahar long taim wanpela bom i bagarapim haus bilong brata bilong em long 2 klok moning. Em i tok tupela pikinini man na tu-

pela meri long famili bilong em i dai long dispela birua. Em i tok ol soldia bilong Afgan i ol rausim bodi na karim i go long haus sik.

Em i tok wanem samting ol Amerika i mekim long Helmand i no stret. Em i tok ol i dropim bom long ol sivilien na i no long ol lain Taliban. Em i tok ol Taliban i no stap klostu long haus bilong brata bilong em.

Long 2016, UN i bin ripot olsem i gat planti moa man-meri nating i bin dai long dispela woa long Afganistan. Dispela woa long Afganistan i winim 15 yia nau. Ripot i tok klostu 1,000 pikinini i bin dai long dispela woa long Afganistan las yia.

Long narapela birua long Helmand long Sarere, wanpela kar bom i bin pairap na kilim 7-pela sivilien na 7-pela arapela i bin kisim bagarap. Planti bilong ol dispela lain husat i bin kisim bagarap em ol pikinini husat i wok long salim ol samting long strit.

Not Korea i sutim roket bom i go 500km long solwara bilong Japan



Saut Korea TV ripot i tokaut long Not Korea i sutim roket bom.

Not Korea i sutim roket bom i go 500km long solwara bilong Japan

LAS wik Not Korea i bin sutim wanpela misail o roket bom i go antap inap long 500km na bihain em i pundaun long solwara bilong Japan. Saut Korea i tok Not Korea i mekim olsem long soim strong bilong en long nupela Presiden bilong Amerika, Donald Trump.

Ol ripot i tok Not Korea i bin sutim dispela roket bom long las wik Sande long Banghyon, westen rijon bilong kantri. Ripot i tok tu olsem Not Korea i bin testim strongpela mid-rens roket bom ol i kolim Musudan, long dispela hap long 15 na 20 Oktoba 2016.

Ripot i kam long Saut Korea i tok dispela roket bom em i wanpela Rodong medium-rens misail na em i

nupela kain roket bom inap winim mak bilong 550km.

Ekting Presiden na Praim Minista bilong Saut Korea, Hwang Kyo-ahn, i tok kantri bilong em i wok wantaim ol arapela kantri long painim rot bilong givim mekim-save long Not Korea.

Praim Minista bilong Japan, Shinzo Abe, i bin go bungim Presiden bilong Amerika, Donald Trump long dispela taim. Na long taim em i harim dispela nius long Florida, em i tok kantri bilong em bai i no inap lukluk nating long dispela pasin Not Korea i mekim long sutim dispela roket bom i kam pundaun long solwara bilong Japan.

Mista Abe i tok Not Korea i no ken brukim ol rul bilong UN sekyuriti kaunsil. Presiden Trump i tok USA i stap baksait long Japan na i sapos

tim dispela pren bilong em.

Leptenen Kenel Martin ODonell bilong US Stratejik Komand i tok Not Korea i bin testim dispela medium o intemediet-rens roket bom i bin kamap klostu long Kusong siti. Ol i bihainim ran bilong dispela misail na lukim em i go pundaun long solwara bilong Japan.

Lida bilong Not Korea, Kim Jong-un, i bin toktok long ol pipel long Nu Yia na em i tokim ol olsem ol wok redi bilong sutim wanpela roket bom i go longwe tru long narapela kontinen, klostu i pinis nau.

Gavman bilong Presiden Donald Trump i promis long givim sampela strongpela mekim-save long gavman bilong Not Korea long dispela program bilong en long wokim ol roket bom.

ol wolnius poto



Angela Merkel Sansela bilong Jeman i tok amamas long Walter Steinmeier i kamap presiden bilong Jeman.



Pablo Iglesias i apim han bihain long ol i makim em gen olsem seketeri jeneral bilong Podemos wantaim 89 pesen vot long pati kongres long Madrid.

Hela luksave long turis bisnis

BILAS na kalsa bilong ol manmeri bai no inap pinis tasol oil, ges na maining risos bai pinis, Sif Eksekutiv Opisa (CEO) bilong Tourism Promotion Authority (TPA), Jerry Angus, i tok.

PNG i gat moa long 800 kain kain kalsa, tok ples, bilas na pasin.

Bus, graun na wara long wan wan provins bilong dispela kantri em i narapela kain tru.

Wanem samting yu lukim long Is Sepik em i no wankain olsem wanem samting bai yu lukim long Simbu.

Mista Angus i tok nambis, maunten, wara, na kain kain animol olsem pisin na pis i save pulim planti turis long kam lukim PNG.

Em i tok wan wan provins i gat kalsa bilong ol we dispela ol kalsa i save pulim tingting bilong planti ol manmeri long arapela kantri.

Wankain olsem arapela ol provins, Hela em i wanpela provins insait long kantri we bilas bilong ol i save pulim intres bilong moa turis manmeri long kam lukluk raun long kantri.

Namel long 1980 na 1990, namba bilong turis husat i

save kam raun long kantri long lukim bilas bilong Hela i bin stap antap tru.

Tasol taim pait na hevi bilong lo na oda i kamap, namba bilong turis i wok long pundaun i kam daun.

Hela Provinsal Gavman i luksave olsem turis bisnis em i nambawan samting long strongim ikonomi na kirapim moa wok mani bilong ol manmeri.

TPA wantaim Hela Provinsal Gavman i laik kirapim gen namba bilong turis na promotim moa turis bisnis long Hela Provins.

Hela Provinsal Gavman i givim K2 milien long statim Hela Turisim Bureau.

Gavana bilong Hela, Francis Potape, i tok dispela bureau bai wokbung wantaim TPA long kirapim turisim masta plen, promotim ol kalsa, ats na turisim, na wokbung wantaim TPA long mekim arapela wok long kirapim bisnis bilong turis.

Tupela wik i go pinis, Minista bilong Kalsa, Ats na Turisim, Tobias Kulang, i bin wanbel long lukim dispela helpim Gavana Potape i givim long kirapim turisim long Hela.

Mista Kulang i givim K100,

000 long Hela turisim bureau long skruim gutpela wok ol i mekim long kirapim turis bisnis.

“PNG LNG Projek i kamap long Hela em i wanpela bikpela invesmen na mipela i amamas long dispela bikos em i kirapim moa wok na kirapim ikonomi,” Mista Kulang i tok.

Tasol wanpela taim oil na ges bai pinis, na dispela taim turis bisnis bai stap yet.

“Bilas bilong Hela i save pulim moa turis i kam insait long kantri bilong yumi. Yumi mas strongim bisnis bilong turis na mekim moa wok long pulim moa turis i kam insait,” Mista Kulang i tok.

Mista Potape i tok hevi bilong lo na oda em i wanpela bikpela samting we i wok long daunim planti gutpela samting i laik kamap long provins bilong em.

Taim em i kisim ples bilong Anderson Agiru, Mista Potape i givim K1 milien long provinsal lo na oda komiti siaman, Eric Yawas, long mekim wok long daunim pasin nogut long provins.

Mista Potape i laik daunim pasin nogut long provins na senisim pasin bi-



Ol man Hela i bilas na holim banara long as bilong Ambua maunten long Tari Gap.

long ol manmeri.

“Mipela i laik opim gen Hawa haus kalabus. Taim haus kalabus i op, mi bilip olsem planti manmeri bai senisim pasin na stopim trabel,” em i tok.

Mista Potape i tok gavman i mas sapotim Hela provinsal gavman long daunim level bilong lo na oda na pasin nogut.

“Sapot bilong gavman em i namba wan samting. Mi wanbel long wok ami na polis i mekim long Hela, we ol i stopim pait na kisim bek sampela gan,” em i tok.

Mista Potape i tok rot na bris em i narapela namba wan samting gavman i mas putim long larim ol turis i raun gut.

“Mipela i nidim gutpela

rot na bris. Gavman i ken sapotim mipela wantaim gutpela rot na bris,” Mista Potape i tok.

Mista Potape i tok tenkyu long TPA i soim sapot long Hela i kirapim gen turis bisnis.

Hela Provinsal Edministreta, William Bando, i tok namba bilong turis long taim bipo i save planti tru tasol pait long provins i mekim na planti turis i stopim raun bilong ol long Hela.

“Kalsa na bilas bilong Hela i save pulim planti turis i kam insait tasol pait i bagarapim turisim indastri long Hela.

“Mipela i laik kirapim gen dispela na mi wanbel long gavman i givim dispela sapot na luksave long turis

bisnis,” Mista Bando i tok.

Mista Bando em i pastaim wokman bilong TPA.

Mista Kulang i tok em i gat strongpela bilip long Hela i ken pulim moa turis i kam insait long kantri.

“Kala na stail bilong bilas bilong Hela i ken pulim moa turis i kam insait long kantri bilong yumi.

“TPA i ken mekim maketing long ovasis. Ol turis i ken lukim kala bilong Hela wigman na kam lukim raun long kantri bilong yumi.

“Ol turis i kisim mani i kam insait long kantri bilong yumi. Mi laik tok tenkyu long Hela Provinsal Gavman i wanbel long wokbung wantaim mipela long TPA long strongim bisnis bilong turis,” Mista Kulang i tok.

IEA wok manmeri joinim NASCARE

OL wok manmeri bilong International Education Agency (IEA) i rejistaim ol yet long kisim insurens kava bilong NCSL.

NASCARE em i nem bilong insurens prodak bilong NCSL. Ol manmeri husat i laik kisim insurens sevis bilong NCSL i mas kamap memba bilong NCSL pastaim na bihain ol i ken kisim NASCARE.

Kopret Sevis Dairekra bilong IEA, Reg Monagi, i tok ol i rejistaim 382 wok manmeri bilong IEA i kamap memba bilong NCSL.

“NASCARE em i gutpela prodak we mipela i laikim ol wok manmeri bilong mipela long kisim dispela sevis,” em i tok.

NASCARE i save givim medikel na laik insurens sevis long ol memba bilong NCSL.

IEA na NCSL i bin holim wanpela miting long Desember long las yia.

Bihain long dispela miting, IEA i wanbel long larim ol wok manmeri i kamap memba bilong NCSL, na kisim insurens sevis long NASCARE.

IEA i gat 19 skul long olgeta hap long kantri na ol tisa na wok manmeri bilong em long dispela skul bai gat sans long kamap memba na

kisim insurens sevis.

Opisa bilong NASCARE, Melisa Brabar, i tok IEA i kamap namba wan kampani insait long kantri long bringim planti wok manmeri i kam long stretim insurens.

“Ol memba bilong NCSL husat i stap aninit long NASCARE i ken kisim K70, 000 long wan wan yia wantaim narapela K40, 000 laik benefit,” Mis Brabar i tok.

Em i tok insurens polisi bilong NASCARE i givim tok orait long meri, pikinini na papamama bilong ol manmeri husat i stap aninit long NASCARE long kisim ol benefit na mani.

Pacific MMI Insurance em i patna bilong NASCARE we i save givim medikel insurens na Capital Life Insurance i save stretim laik insurens kava.

Mis Brabar i tok polisi bilong NASCARE i save larim ol memba i kisim bek 80 pesen bilong mani ol i bin putim aninit long insurens kava bilong ol.

Em i tok moa long 800 memba bilong NCSL i joinim NASCARE pinis na dispela i givim sans long ol i stretim laik na medikel insurens kava bilong ol.

Siaman bilong NCSL laik strongim wok

SIAMAN bilong NASFUND Contributors Savings & Loan Society Limited’s (NCSL), Ian Tarutia, i tokim ol wok manmeri bilong NCSL long strongim gutpela wok ol i save mekim long givim gutpela sevis long ol memba.

Mista Tarutia i bin mekim dispela toktok long las wik taim em i bin bungim ol wok manmeri bilong NCSL long het opis bilong ol long Pot Mosbi.

Em i bin tokim ol wok manmeri bilong NCSL long strongim gutpela wok ol i mekim na sevim gut ol memba bilong NCSL long wan wan provins.

“Long larim NCSL i kamap olsem arapela bikpela benk na givim wankain sevis, wok



Mista Tarutia i toktok long ol wok manmeri bilong NCSL.

manmeri i mas wokbung wantaim na givim gut sevis long ol memba,” Mista Tarutia i tok.

NCSL i kamapim pinis wanpela nupela online operating sistem long larim ol memba i kisim sevis long taim na ol bai no inap westim taim.

Dispela em i wanpela gutpela samting we NCSL i bin kirapim long strongim wok

bilong em long givim gut sevis long ol memba.

“NASFUND na NCSL bai wokbung wantaim olsem wanpela tim na apim level bilong wok long sevim gut ol memba,” Mista Tarutia i tok.

Em i tok bod bilong NCSL i givim tok orait long larim eksen plen bilong NCSL i go het.

“Menesmen i wok bihainim

dispela plen na redi long givim planti nupela prodak na sevis long ol memba bilong NCSL,” Mista Tarutia i tok.

Mista Tarutia i tok tenkyu long olgeta wok manmeri husat i bin mekim hatwok long larim NCSL i ran gut long yia 2016 na em i askim ol wok manmeri long strongim dispela wok long yia 2017.

Mani mak bilong mekim bisnis antap tru

OL liklik manmeri i hat long statim bisnis long PNG bikos kantri bilong yumi em i wanpela ekspensip kantri long mekim bisnis, wanpela save-man i tok.

Dairekta bilong National Research Institute (NRI) Dokta Charles Yala i tok kos to mani mak bilong statim bisnis long PNG em i antap tru bikos

“Ol liklik manmeri i hat long statim liklik bisnis o smol-tu-medium entaprais

(SME) bikos mani mak bilong statim bisnis em i antap tru,” Dokta Yala i tok.

Em i tok planti manmeri PNG i save kisim hat taim long statim nupela bisnis bikos mani mak bilong baim ol samting bilong statim bisnis em bikpela mani tru.

Dokta Yala i tok taim prais bilong statim bisnis i save go antap, kantri bai lusim sans bilong larim ol manmeri i kisim wok na kisim mani i kam insait.

“Invesmen em i wanpela samting we kantri i nidim. Sapos mani mak bilong mekim bisnis i go antap, ol foren investa bai les long kam mekim bisnis long hia.

“Taim mani mak bilong mekim bisnis i save go antap, dispela i save pasim sans bilong ol manmeri PNG i kirapim nupela bisnis.

“Sapos nupela bisnis i no kamap, ol manmeri bai no inap long kisim wok. Wok mani i save kamap taim nu-

pela bisnis i save kirap,” Dokta Yala i tok.

Dokta Yala, husat i wanpela saveman bilong ikonomi, i askim gavman long lukluk long dispela.

“Gavman i toktok long strongim SME, tasol ol i mas lukluk long dispela kain samting. Yumi daunim mani mak na planti bisnis bai kirap, ikonomi bai kirap na laik bilong manmeri bai stap gut taim developmen i kamap,” em i tok.

Usino LLG i sapotim wok poltri long distrik

MY midia nius

USINO Lokal Level Gavaman (LLG) insait long Usino-Bundi distrik, Madang provins i sapotim ol wok egrikalsa na poltri we bai helpim ol pipel bilong em i kirapim tingting bilong Smol na Midium Enteprais (SME) we gavaman i tok strong long en.

Aninit long gutpela na strongpela lidasip bilong Usino LLG Presiden, Joseph Kumun i sapotim strong tu ol wan wan ol poltri fama we i ken wok insait long komyuniti na kaunsel wod bilong ol we ken kamapim planti gutpela samting bilong helpim ol pipel na komyuniti tu.

Long Trinde Feb 8, Mista Kumun i givim sampela hadwe matiriel bilong wokim haus pato i go long man i go pas long kamapim dispela pato fam kong Usino, Mathew Yakai aninit long Borkent Famili na Wod 31 kaunsel wod long Usino ples.

Dispela projek bai sanap long Yamagi asples, klostu long Usino insait long Wod 31 na as tingting em long kamapim gutpela sindaun insait long komyuniti na kirapaim ol projek bilong helpim ol famili.

Mista Kumun i givim ol matiriel long mani mak bilong K6,644.60 we i karamapim ol samting



Usino LLG Presiden, Joseph Kumun i givim ol hadwe matiriel i go long Mathew Yakai, kodineta bilong Usino pato fam long Trinde Feb 8 long Plum Tred long Madang

olsem kapa, banis waiya bilong pato, ol nil na planti samting we bai pinisim stret dispela haus pato na banis.

“Olsem lida, mi laik lukim ol wan wan manmeri na famili na komyuniti i mas kamap wantaim ol kain kain projek long helpim ol yet na ol komyuniti na distrik tu,”

“Praioriti bilong mi em long kirapim welt o mani, mas lukim ol pipel bilong mi stap insait long ol wok ikonomi we i ken daunim ol biruwa pasin we i ken bagarapim laip bilong ol wan wan,” Mista Kumun i tok.

Mista Kumun i tok em i gat bikipela bilip long lukim ol pipel bilong em insait long Usino LLG i kamapim ol liklik

wok we i ken helpim ol long sanap ol yet na bihain i ken kamapim bikipela senis insait long distrik na kantri na kamap bikipela bisnisman na meri.

“Plen bilong mi em i go wantaim Visen 2050 bilong Gavaman we ol pipel bilong Usino LLG i mas wokim bisnis aninit long SME we nau yumi gat bikipela ol projek olsem Ramu NiCo, Marengo, Ramu Agri na ol narapela,” Mista Kumun i tok

Taim Mista Yakai i kisim ol matiriel, em i tok tenkyu tru i go long Presiden Kumun na tok em bai wok hat long kamapim dispela projek i gro aninit long wok patnasip wantaim Ramu NiCo

Komyuniti Afes, Usino LLG na Ward 31 long Usino LLG.

“Dispela pato fam bai kamap olsem wanpela model fam insait long Usino-Bundi distrik na planti lain i ken kisim gutpela samting na tu lainim long kamapim fam bilong ol yet,” Mista Yakai i tok.

Ramu NiCo menesmen i sapotim dispela projek na tok em bai helpim long sait bilong ol save long kamapim na ranim pato projek inap taim em i gro bikipela.

Long Trinde Ramu NiCo i helpim wantaim kar long kisim ol dispela matiriel i go long Usino na promis olsem wankain helpim bai kamap taim projek i stat.

Krangket Ailan pipel nidim ilektrisiti

Mathew Yakai i raitim

SAMPELA trupela Papua Niugini sitisen husat i save baim takis nau i stap long Krangket Ailan klostu long Madang taun i nidim ilektrisiti bihain long tupela yia ol i stap long tudak.

Bihain long marin kebol i konekim Madang bik ples wantaim Krangket ailan, pawa lain i go long ailan i bin bruk tasol PNG Pawa wantaim lokal lida bilong Madang i pasim ai na i no lukim hevi bilong ol pipel i

stap long ailan na ol i no traim liklik long putim pawa i go bek gen long ailan.

Krangket ailan i gat ol pipel i kam long olgeta hap bilong kantri husat i wok olsem ol pablik sevan na

long praivet sekta olsem ol liklik bisnis.

Maggie Borkent bilong Usino LLG i save rentim rum long Kilingoi Lodge i tok pawa i no save kam long Kilingoi Lodge inap tupela

yia olgeta. Krangket lodge long ailan tu i lusim planti bisnis bikos long dispela. Planti ol liklik bisnis tu i no mekim mani nau bikos ol i no gat ilektrisiti long mekim wok bilong.



Maggie Borkent bilong Usino LLG i save rentim rum long Kilingoi Lodge i soim pawa pos long Kilingoi Lodge we i no bin kisim pawa i kam inap tupela yia olgeta. Poto: Mathew Yakai bilong MY Midia & Nius Ejensi

Didiman toktok



Profesa John Warren - Vais Sansela, PNG Yunivesiti bilong Nesurel Risos na Envairomen i raitim

UNRE Staf i mas amamas long pe bilong ol

OL STAF o wokman na wokmeri bilong Nesurel Risos na Envairomen i mas wok wantaim trupela tingting na ol i mas tenkyu long wanem pe ol i kisim long wok bilong ol.

Pro Vais Sansela Edministresen na Developmen, Dokta Aisak Pue i tokim ol Yunivesiti Woklain long tiam ol i bin bung long Mande dispela wik olsem Yunivesiti Edministresen i no bin asua long i no baim ol wantaim ol senis long pe olsem 7.5 pesen na 3 pesen. Em i tok UNRE i no olsem ol narapela institusen bikos em i save luakutum gut ol wokman na wokmeri bilong en na olgeta tiam i save wokim pe bilong ol na i no save leit, maski Nesenel Gavman i no save givim ol mani bilong mun hariap.

Dokta Pue i tok UNRE em i intelektual institusen na ol wokman na wokmeri o staf i gat asua na wok long ol i mas mekim gut wok bilong ol, ol i mas kamap long taim bilong wok, ol i mas stap strong na mekim wok bilong ol long sevim Yunivesiti.

Yunivesiti Vais Sansela, Profesa John Warren i mekim wankain toktok tu. Em i tok olsem long helpim ol wantaim ol hevi bilong fainens long Yunivesiti, i mas gat wanbel namel long ol long sevim mani long ol i ken yusim long ol bikipela wok bilong Yunivesiti. Long helpim ol wokman na wokmeri wantaim ol sumatin long kisim moa save long daunim ol kost, em i gat wanpela posta kempen i stat pinis, wantaim tupela namba wan toksave o notis i go antap long ol notis bod insait long kempas long las wik yet.

Profesa Warren i tok ol staf na sumatin i ken helpim long swisim on lait na ea kondisen taim ol i lusim ol opis; no ken yusim ol kar bilong yunivesiti nating, nating; na no ken bagarapim ol domitori o haus slip bilong sumatin na ol narapela propeti bilong stet.

Em i tok moa olsem dispela awenes i no bilong kirapim bel long mekim ol man i belhat, tasol em i singaut long helpim ol long luksave long ol hap bilong Yunivesiti we inap long daunim sampela kost na ol i ken sevim mani long em i ken go long ol wok bilong kamapim gut skul olsem long baim moa laibreri buk na kamapim ol haus bilong skul.

PNG UNRE NSA presiden, Betty Kenny i singaut long ol staf long mekim 2017 gutpela moa yia na em i givim tok promis long asosiesen bai wok klostu wantaim Yunivesiti Edministresen long stretim ol hevi bilong ol staf o wokman na wokmeri. Yunivesiti bai gat Dedikesen Sevis bilong ol staf long dispela Sande i kam.

Ol pis i pulap yet long Ramu Riva

OL ples klostu long Ramu Riva i tok dispela wara em i olsem beng we planti kain kain pis na abus bilong wara i save stap long taim bilong ol tumbuna yet i kam inap nau.

Dispela tok bilong ol i tru bikos long taim Steve Opor na Alex, tupela saintis bilong Ramu NiCo, i bin mekim wok painimaut long dispela wara, ol i bin kisim planti kain kain pis.

Dispela wok painimaut i save kamap tupela taim long wanpela yia na ol i bin mekim namba wan hap bilong dispela wok long 6 i go inap 24 Januери long dispela yia.

Lo bilong gavman i tok kampani i mas wokim dispela sevei o wok painimaut aninit long Ramu NiCo Projek OEMP (Operesenel Envairomen Manesemen Plen).

Wara Ramu bai i stap oltaim long givim fres pis long ol ples i stap arere long wara, na tu, em i rot bilong ol pipel long go i kam long kanu bilong ol bikos i no gat rot bilong kar long planti bilong ol dispela ples.

Long dispela sevei bilong Steven na Alex, ol i lukim olsem i no gat birua i kamap long ol enimal na laip i stap long Ramu wara eria.

Thurston i amamasim ol Indigenous All Stars wantaim bikpela win



Ol Indigenous All Stars i amamas bihain long Johnathan Thurston i putim trai.

JOHNATHAN Thurston i stap long gutpela fom taim tim bilong em i win namba 4 taim long ol 7-pela resis na nau ol i stap pas long ol-geta yia resis.

Poin ol i skorim long namba wan kwata i strongim ol Indigenous All Stars long win, 34-8, egensim ol World All Stars.

Tupela tim wantaim i holim pas bihain long resis i pinis na pilaia bilong ol Indigenous All Stars, Greg Inglis, i go pas long ol na ol i kra i bihain long daunim ol World All Stars.

Pilaia bilong ol Indige-

nous, Jack Bird, i bin putim namba wan trai bilong ol bihain long namba 3 minit bilong resis taim.

Blake Ferguson i bin putim namba tu trai bilong ol Indigenous bihain long Akuila Uate bilong ol World i mekim wanpela asua.

Ol Indigenous i stap pas wantaim 16 poin long namba wan hap bilong resis we ol World All Star i no bin kisim wanpela skoa yet bihain long Ash Taylor bilong Indigenous i putim namba tri trai.

Klostu long pinis bilong namba wan hap bilong resis, David Mead, i bin putim

wanpela trai bilong ol World All Stars na insait long 60 seken i stap yet long bungim pinis taim bilong namba wan hap bilong resis, Nene Macdonald i putim narapela trai gen.

Ol Indigenous i bin skruim poin bilong ol yet bihain long Thurston i bin putim namba 4 trai bilong ol na ol i stap pas, 22-8.

Trai bilong ol World All Stars i kam mak olsem tasol Dane Gagai na Leilani Latu bilong Indigenous All Stars i putim tupela trai na skruim poin bilong ol i go antap long 34-8.

Indigenous All Stars meri tim i brukim histori



Ol Indigenous All Star meri i bin amamas na holim pas bihain long ol i daunim ol World All Star meri long namba wan taim.

INDIGENOUS All Stars tim bilong ol meri i daunim ol World All Stars meri tim long namba wan taim wantaim bikpela poin, 14-4, long McDonald Jones Stediam long las wik Fraide.

Dean Widder husat i go pas long ol Indigenous wantaim ol skwat bilong em i soim namba wan kala bilong ol long ranim bal na strongim banis bilong ol egensim ol World tim.

Ol pilaia bilong Indigenous tim husat i bin putim tripela trai em namba wan taim bilong ol long pilai long All Stars resis.

Ol Indigenous i bin strongim banis bilong ol na i no bin putim wanpela rot bilong ol World tim.

Resis i luk olsem wanpela pait i kamap namel long tupela tim long namba tu kwata taim bek-roa bilong Indigenous, Kandy Kendeny, i kisim bagarap long lek bilong em bihain long World pilaia, Kody House, i takelim em.

Namba wan poin i bin kamap long namba tu kwata bilong resis taim Samatha Leisha i bin putim trai. Konvesen kik bilong Caitlyn Moran i go insait na ol In-

digenous i stap pas, 6-0, long taim bilong malolo.

Long stat bilong namba tu hap bilong resis i lukim winga bilong ol Indigenous meri, Savannah Connors, i putim namba tu trai bilong ol.

Taim 4-pela minit i stap yet long bungim pinis taim bilong resis, Narapela winga, Tahlia Hunter, i putim namba tri trai bilong ol Indigenous na bringim skoa i go antap long 14-0.

World tim bilong ol meri i les long ol i lus long nil o nogat poin na ol i strong tru long las minit na putim wanpela trai na kisim 4 poin.

Chelsea i go antap wantaim 10 poin ...Leicester i go daun gen

LIDA bilong Premia Lig Futbal, Chelsea, i dro, 1-1, egensim asples tim, tasol ol i go antap wantaim 10 poin na i stap top long lata.

Pilaia bilong Chelsea, Pedro, i bin putim wanpela gol pas, tasol ol asples i strong na bungim skoa bilong ol gen long namel bilong namba wan hap bilong resis bihain long Robbie Brady i kikim dispela bal i go insait long net.

Long wankain taim, ol sempion, Leicester City, i stap insait long bikpela hevi bihain long ol Swansea City i bin daunim ol, 2-0. Ol Swansea i go tripela poin antap long ol long lata.



Chelsea pilaia, Gary Cahill.

Anthony Yigit i daunim Lenny Daws

ANTHONY Yigit i daunim Lenny Daws wantaim ol poin na i winim Yuropien supa laitweit taitel long las wik Sarere nait.

Dispela em i namba wan taim bilong ol Sweden long winim dispela taitel inap long 1987 na dispela em i namba tri taim bilong Daws long lus long kisim dispela belt. Ruben Nieto na Michele di Rocco i daunim em bipo.



Anthony Yigit em i nupela Yuropien laitweit sempion.

Chiefs i winim Brisbane bihain long Lauaki i dai

OL Chiefs i winim namba wan Brisbane Global Ragbi Tennis taitel bihain long pilaia bilong All Black, Sione Lauaki, i dai.

Ol Chiefs i bin daunim ol Crusaders, 12-5, long Sun-corp Satediam long las wik Sande.

Lauaki, em i 17-kep All Black pilaia, i bin pilai 70 Supa Ragbi resis bilong ol Chiefs long Waikato, i gat 35 krismas i bin dai long Sande moning bipo long fainal resis.

Em i bin stat sik long 2012

long kidni na lewa bilong em. Planti ol bipo poro pilaia na kosa bilong em i kirap no gut taim ol i bin harim stori long Brisbane na ol i no pilai long dispela taim.

Kepten bilong ol, Liam Messam, i bin flai i go long ples bilong Lauaki bihain long kwata fainal long sapotim ol poro na famili bilong Lauaki. Tasol, tim bilong ol i win em i namba wan samting long tok sori long dai bilong Lauaki.

Ol Chiefs i bin lus long Sarere egensim ol Mel-

bourne Reds tasol ol i daunim ol Panasonic Wild Knights, 33-5, long Sande, bipo long daunim ol Queensland Reds, 12-10, long kwata fainal resis.

Shaun Stevenson i kamap namba wan pilaia bilong ol Chief long de namba tu na i bin putim wanpela trai long semi fainal long kisim ples long semi fainal.

Crusaders i bin daunim ol Hurricanes, 17-7, long narapela semi fainal bipo long resis egensim ol Chiefs long taitel resis.



Tim Nanai-Williams na Liam Messam i lukluk i go antap long skai na tok sori long Sione Lauaki.



Lokal Ramu NiCo wok-lain mas save moa long sistem bilong prosesing



BSK Refaineri Prosesing Treina, Kamas Nisarap i givim salens long ol opereta long save gut long ol prosesing sistem long Laimston Krasing Plen.



Laim Mill seksen tim lida Ati G. John na opereta Gawi Tambibi i harim skul toktok bilong treina Kamas Nisarap.

OL LOKAL wokman bilong Ramu NiCo (MCC) long Usino-Bundi na Raikos distrik long Madang mas givim moa taim long lainim na save gut long wanem bikpela prosesing wok eria ol i wok i stap long en.

Ol mas save long ol pats bilong masin, sistem bilong wok na ol ikwipmen we i stap wantaim nikel/kobalt prosesing bilong Ramu NiCo Projek.

Dispela em strongpela salens na gutpela skul toktok Basamuk Rifaineri Trening na Dvelopmen Dipatmen, Prosesing Treina, Kamas Nisarap i mekim long taim em i givim prektikal skills aweanes trening long ol BSK Laimston Krasing Plent na Laim Mill opereta dispela wik.

Em i tok olsem taim ol lokal opereta i save gut long ol ikwipmen na proses flo, o rot bilong prosesing masin ol i wok wantaim, em bai helpim ol wantaim gutpela tingting. Moa long en tu ol opereta bai save gut long ol prosesing sistem bilong wok na tu ol ikwipmen na masin na nem na wok bilong wanem ol ikwipmen na prosesing sistem

Nisarap, em wanpela proses treina tasol long Basamuk Rifaineri Trening na Dvelopmen Dipatmen. Em i save traime hat tru long bringim skul i go long ol opereta long wan wan ol dipatmen long dispela operesen bilong rifaineri. Sampela taim em i save bringim ol fil trening aweanes i go long ol opereta taim ol i bisi yet long wok i stap.

Em i tok sampela taim ol ausait lain olsem ol inspekta bilong Mineral Risoses Atoriti (MRA) bai go raun na sekim wok na askim kwesken, olsem na ol lokal opereta mas save gut long nem na wok bilong wanem masin ol i wok wantaim na givim gutpela ansa i go bek.

Em i tokim ol lain long Laim Krasing Plent na long Laim Milling olsem, wanem ol trening ol i lainim em ol mas holim strong. Em i salensim ol olsem long fri taim bilong ol tu ol i mas ritim ol trening pepa em i givim long save gut long wok insait long dipatmen ol i stap long en.

“Yupela mas amamas olsem yupela namba wan lain long wok wantaim nikel na kobalt maining

prosesing sistem, olsem na yupela bai lainim gut na kisim onasip long wok” Kamas i tok.

Dispela ol besik aweanes long Laim Mill na Laimston Krasa em long opim tingting bilong ol PNG Nesenel woklain long save gut long wanem wok i stap insait long dipatmen o seksen bilong ol, na tu ol opereta mas save long ol rot. Em bai givim klia tingting long ol opereta long save gut long wane m ol ikwipmen i go wantaim prosesing eria ol i stap long en.

Long dispela yia, Ramu NiCo BSK Trening na Dvelopmen Dipatmen i redim o plen bilong en pinis long kamapim ol trening we i go wantaim kompietensi. Dispela i min olsem trening bai skelim skills na

save na wok bilong ol opereta na strongim ol long gohet na kamapim moa gutpela wok.

Presiden bilong Ramu NiCo, Gao Yongxue i tokaut tu long taim bilong Kampani Wok Konperens olsem trening em bikpela samting.

Mista Gao i tok olsem moa trening i mas kamap na dispela bai karamapim trening bilong ol menesmen, ol teknikal wok lain na ol opereta.

Presiden Gao i tokaut tu olsem long sait bilong ol PNG Nesenel wok lain, wok nau bai stat long gredim ol wok lain bihainim wok ol i mekim na save long em, operesional kompetensi na wanem wok ol i wokim na i save gut tru long en na i save mekim oltaim.



Aweanes fil trening long Laim Mill long BSK Rifaineri.



Salens long ol opereta long save gut long ol ikwipmen na proses.



135 KM Slurry Pipeline



PNG Gems bai kamap bihain long Ileksen



(L-R) CEO bilong PNG Spot Faundesen, Peter Tsiamalili, Spot Minista, Justin Tkatchenko na Deputi Siaman bilong PNG Gems Host Ogenaising Komiti (HOS), Dacca Wagai.

Philemon Tame i raitim

NAMBA seven PNG Gems em ol i bin skruim i go long pinis bilong dispela yia ol bai stat long Novemba 18 i go inap long Desemba 2.

Dispela i lukim olsem gem bai kamap bihain long pinis bilong 2017 Nesanel Ileksen. Spot Minista, Justin Tkatchenko, CEO bilong PNG Spot Faundesen, Peter Tsiamalili Jr, na Deputi Siaman bilong PNG Gems Host Ogenaising Komiti (HOS), Dacca Wagai, i bin tokaut long dispela tok save long pres konpres i bin kamap long las wik.

Tkatchenko i bin tok klia bihain long em i bin toktok wantaim HOC na PNG Gems Kaunsil long dispela toktok we ol i bin kamap wantaim wanpela disisen long skruim PNG Gems.

Minista bilong Spot i tok, PNG Nesanel Weda Sevis i ripo i go long HOC na PNG Gems Kaunsil olsem ren bai pundaun long Wes Nu Briten insait long tupela mun bilong resis.

“Weda i no larim yumi long ranim gem. Mi bin

lukim piksa bilong olgeta hap long Wes Nu Briten i karamapim wantaim wara long taim bilong pilai.

“Taim tok profet bilong weda i tok klia, dispela ren bai go het na bagarapim olgeta fesiliti, bagarapim wok bilong kontrakta na bagarapim hap bilong pilai,” Tkatchenko i tok.

Tkatchenko i tok klia tu olsem, ol i skruim PNG Gems em i no bilong ol i no baim kontrakta long pinisim olgeta hap bilong pilai, no gat. Em i tok 90 pesen bilong wok em ol i bin pinisim.

“Ol i bin baim kontrakta bilong wok ol i bin mekim,” Tkatchenko i tok.

Em i tok klia tu olsem sampela provins tu i no redi yet na dispela em i narapela as tingting long ol skruim taim.

“Bikos, ileksen i kamap klostu na planti bilong ol Gavana na Open Membra i no makim tim bilong ol na salim i go long resis long PNG Gems bai kamap long dispela yia. Dispela em i wari, bikos i lukim olsem ol i gat ol narapela samting i bikpela moa long ol spoting tim ol i laik salim i go long PNG Gems.

“Planti bilong ol provins i no salim tim lista bilong ol yet na dispela em i narapela wari i stap yet,” Tkatchenko i tok.

Tkatchenko i tok moa olsem narapela as tingting bilong ol i skruim gem bikos taim em i no orait.

“Nesanel ileksen i kamap klostu na ol bai givim aut ol rits long Epril 20. Dispela em i klostu long PNG Gems na dispela em i as tingting mipela i lukim olsem planti ol provinsal tim i no givim tim lista bilong ol.

“Na tu, mipela i wok wantaim edukesen dipatmen long kisim holide long taim bilong PNG Gems bilong yusim sampela skul haus long taim bilong gem.

“Long kamapim gem long Mas em mipela i painim hat long grisim edikesen dipatmen long kisim skul holide long wankain taim bilong PNG Gems. Dispela em i narapela as tingting mipela i bin skruim gem.

“HOC i rekomendim Praim Minista na mi yet aninit long Gavana bilong Wes Nu Briten, mipela i lukluk long skruim PNG Gems,” Tkatchenko i tok.

Sepik salens bilong CCIC bai stat long Fraide

Coca-Cola Ipatas Kap (CCIC) salens long Sepik bai stat tumora, Fraide, na kodineta bilong Sepik Salens, Bradley Simon, i tokim olgeta tim long soim trupela kala bilong spot man long taim bilong tripela de tonamen.

Namba wan taim bilong Is Sepik Provins we ol tim long Maprik, Vanimo na Wewak bai bung long Maprik bilong

pait long winim wanpela golden pas.

“Olgeta tim i redi pinis na wok redi long pilai graun i pinis tu na mipela i redi long statim gem tumora,” Simon i tok.

“Olsem mi kodineta bilong dispela resis, mi gat strongpela tingting olsem gem bai kamap orait na pinis gut long mak. Salens bilong mi long ol boi em ol i

mas pilai strong na soim kala bilong ol gut long winim dispela wanpela golden pas.

“Ipatas Kap resis bai bai kamap em i stat bilong bikpela ragbi lig salens bai kamap long Maprik.

“Sapos mipela i ranim dispela resis na kamap long mak gut bai mipela i ken bid long PNGRFL Noten Jon salens long namel bilong yia.”

Kaputin i kisim awod

NAMBA wan etlit bilong Papua Niugini, Rellie Kaputin, i kisim biknem long em i bin kisim awod long las wiken long Texas Panhandle Spot Hol ov Feim Annual Awod long Amarillo.

Ol i bin givim awod bikos ol i luksave long Kaputin i kamap namba wan etlit long 2012 long kisim biknem long olgeta Amerika long tripela iven long wankain Nesanel Sempionsip.

Em i bin kisim 14 poin long 2016 NCAA Divison namba 2 Nesanel em i bikpela poin long ol narapela Wes Texas etlit long histori bilong skul.

Kaputin i bin pinisim namba tu ples long tripol jam wantaim mak long 12.83 mita. Dispela mak i brukim rekot bilong skul bilong em na Nesanel rekot bilong PNG.

Em i bin pinisim namba 6 ples long hai jam na long jam. Kaputin i putim nupela rekot bilong skul long long jam we em i bin winim 6.22



Rellie Kaputin i resis long Long Jam.

mita long namba foa traim resis bilong em.

Na tu, em i bin winim US Trek na Fil Kosa Asosiesen Nesanel ona long olgeta tripela iven. Em i bin kisim Bob Noble awod aninit long Autstending Fimeil Fil Etlit bilong Lone Star Konpres Sempionsip bihain long em i bin winim long jam na tripol jam na pinisim namba 7 long hai jam.

Kaputin i bin kisim ol dis-

pela awod na i tok, “Mi bin wok hat tru long winim dri-man bilong mi long olgeta resis.

“Ol i luksave long mi wantaim ol dispela spesel awod em i bikpela samting tru bikos mi gat bikpela samting long karim i go bek long kantri bilong mi na em bai kirapim tingting bilong mi long mi bin stap long Texas,” Kaputin i tok.

Ol Hunters i ranim sot kos long Sentral

i kam long pes 28

“Ol Hunters i kam long hia i strongim tingting bilong mipela ol pilaia long tim bilong mi long joinim ol Hunters na Kumuls long wanpela taim.”

Presiden bilong Koita Ragbi Lig Asosiesen, Bisia Geita, i soim amamas bilong em na i tok tenkyu long EMPNG long bringim ol Hunters i go long lokal komyniti bilong ol na givim ol skul toktok long kamap kosa na tok save long ol pipel i bagarap long smokim drag na dringim alkohol.

“Mi gat bikpela tingting long bungim olgeta 4-pela viles na kamapim wanpela ragbi lig skul, long mipela i ken i gat klia rot bilong ol yangpela bilong mipela,” Geita i tok.

Kosa bilong PNG Hunters, Michael Marum, i tok, “Dispela kain program i save helpim ol Hunters long skelim ol skil

na trening na tu, i save painim aut ol gutpela pilaia bilong Hunters husat i kam antap yet.”

Marum i tok tenkyu tu long bikpela namba bilong ol asples lain i pulap na em i kisim dispela taim na i tok tenkyu long Sentrel 9’s ragbi lig, husat ol i kempen long Papa viles long go resis long PNG Gems long Kimbe.

Tim Lida bilong PNG LNG plent Komyuniti Afeas, Marilyn Wingi, i tok tenkyu long ol Hunter, ol lokal ragbi lig asosiesen na PNG LNG komyuniti afeas tim na i tok, “Mi amams long yupela olgeta i kam bung na ol Hunters i ranim dispela kos na pinisim long mak .”

Long pinisim sesen, ol Hunters pilai i bin givim 8-pela ragbi bal long ol 4-pela ragbi asosiesen wantaim ol kep, plak, t-siot, weit beg na posta bilong Hunters.



Ol pilaia bilong ol Hunters i soim sampela teknik na skil bilong takel wantaim ol Porebada Bulldogs.

Namba wan taim bilong Black Sembo i resis long Ipatas Kap

BLACK Sembo em i tim long Erave Distrik long Sauten Hailans Provins. Ol i redi long resis long Ipatas Coca-Cola Ipatas Kap long namba wan taim.

Tim i bungim ol pilaia long ol viles long ples olsem Morogoro, Yanguli na Semborigi long Gobe Oil Projek eria bai resis long Sauten Hailans o Minj lek long Ipatas Kap bai kamap long Fraide.

Bipo pilaia bilong Mendi

Muruks, lan Mako, bai go pas long dispela tim.

Tim Menesa, Cris Wipai, i tok olsem dispela em i namba wan taim bilong tim long resis long Ipatas Kap.

“Black Sembo i lukluk long pinis long top ples,” Wipai i tok.

Wipai i tok tenkyu long Menesa bilong Woks long Mendi, Junior Kupulu, long em i sponsa na mekim isi bilong tim long resis long Ipatas Kap.

Na tu, em i askim ol bisnis haus sapatim tim i laik kisim bikpela ekspiens long Ipatas Kap na bihain ol bai statim resis bilong ol yet long asples.

Wipai i tok tenkyu tu long CEO bilong Ipatas Kap, Timothy Lepa, na ol wok lain husat i go pas long Ipatas Kap resis bilong ol i givim dispela sans long Black Sembo long soim kala bilong ol long ragbi lig gem.

Simbu Ipatas kap salens i pinis wantaim asua



Fainal i kamap namel long Emergency Line Pacific XXX na SSY Brothers long Simbu Ipatas Kap salens.

COCA-Cola Ipatas Kap salens long Simbu i lukim olsem namba wan Tim husat ol i bin givim Gol Pas long go het long neks stej bilong Ipatas Kap em Emergency Line Pacific XXX.

Ol i bin daunim SSY Brothers, 11-0, long winim dispela Gol Pas long wiken bilong tupela wik i go.

I gat sampela asua i

kamap na ol i stopim gem namel long Jaka Miners na Gumine Wisomo bikos CEO i bin kisim olgeta ripot wantaim ol opisal bilong em na Kodineta, Michael Goima. Em bai lukim risal bilong resis na mekim disisen.

Ol lokal judiseri i bung na toktok long dispela hevi, tasol ol i no inap long stre-

tim dispela hevi.

Long dispela as tingting, nau disisen i stap long han bilong nesenel judiseri we PPC Suprintenden bilong Jiwaka, Joseph Tondop, i go pas long dispela.

Tondop bai lukluk long dispela hevi na kamap wantaim wanpela ansa o bekim long husat bai kisim dispela Gol Pas

Ol meri i soim kala long Ipatas Kap sauten salens

Philemon Tame i raitim

OL Meri ragbi lig pilaia husat i save stap long Pot Mosbi i bin gat sans long soim kala bilong ol Ipatas Kap sauten salens long las wik Sande.

Ipatas Kap resis i kamap bikpela hap bilong ol selekta bilong Papua Niugini Ragbi Futbal Lig (PNGRFL) bilong makim ol pilaia bikos Wol Kap bai kamap long dispela yia.

Resis bilong ol meri i kamap namel long ol X-Factor na X-Rox long Kone Tigers pilai graun long Pot Mosbi.

Ol X-Factor i bin daunim ol X-Rox, 12-6, long wanpela strongpela resis.

Bipo skipa bilong Noten Konfederet, Maima Wei, i bin pilai lok na i go pas long

ol X-Factor. Kala bilong em i kamap namba wan we em i salim bal i go long ol poro pilaia taim ol i ran long gep. Na tu em i strongim banis bilong tim bilong em na kisim planti takel.

Long stat bilong pilai, ol X-Rox i skoa paslain bihain long fowod pilai, Winnie Steven na Ewina Etra, i abrusim planti mita klostu long trai lain bilong ol X-Factor.

Ol i bin salim bal i go long Ketri Ango, husat i ran i go long trai lain na putim namba wan trai bilong ol X-Rox, 6-0, bihain long faiv-eit bilong ol, Jenifer Robert, i sanap long saitlain na i kikim konvesen i go insait.

Klostu long pinis bilong namba wan hap bilong pilai, senta pilaia bilong ol X-Fac-

tor, Consy Wamura, i putim namba wan trai bilong ol X-Factor. Huka bilong ol, Dancy Digal, i painim hat long putim konvesen i go insait na ol X-Factor i stap bihain, 4-6, long taim bilong malolo.

Resis i kamap strong long namba tu hap na klostu long pinis bilong resis, senta pilaia bilong ol X-Factors, Joyce Takale, i bin putim namba tu trai bilong ol. Konvesen kik i no go insait na ol X-Factors i stap pas wantaim tupela poin, 8-6.

Tupela minit i stap yet long bungim ful taim, Diane Kaupa i putim las trai bilong ol X-Factor. Ol i daunim ol X-Rox wantaim 6-pela poin, 12-6, bihain long konvesen kik i no go insait.

PNG i stap long namba 3 ples bilong OFC resis

PAPUA Niugini soka tim bilong ol man husat i gat kris-mas daunbilo long 17 o Anda 17 i stap namba tri ples long lata bilong Osenia Futbal Konfederesen Sempionsip (OFC).

OFC Sempionsip resis i kamap long Tahiti we em i

bin stat long Februari 11 i go inap long Februari 24 na 8-pela kantri i resis.

PNG Anda 17 tim i stap long Grup A wantaim Nu Kaledonia, Tahiti na Vanuatu na ol tim i stap long Grup B em Fiji, Samoa, Solomon Ailan na Nu Silan.

Namba wan resis bilong ol PNG i kamap long las wik Sarere, ol PNG lus egensim ol Nu Kaledonia, 3-2, na Tahiti i bin daunim Vanuatu, 1-0.

PNG i resis egensim ol Vanuatu long Tunde na ol bai pilai egensim ol Tahiti long Fraide, Februari 17.

Fainal bilong sauten lek Ipatas Kap i no kamap

Philemon Tame i raitim

FAINAL raun bilong Sauten Ipatas Kap salens i kamap gen long las wik Sande bihain long ol Wanderers i daunim ol Marane Stoneville. Tasol i gat sampela asua i kamap na ol i bin stopim dispela salens wanpela moa taim.

Ol i bin stopim dispela fainal resis bikos, Marane i no wanbel long win bilong ol Wanderers.

Namba wan gem i bin kamap namel long ol NBC Watch Dog na City Redbacks we ol Redbacks i daunim ol NBC Watch Dogs, 15-10.

Bihain long namba tu resis,

ol QPR Wanderers i bin daunim Marane Stoneville, 14-12, tasol ol Marane i no pilim orait wantaim risal.

Ol Marane i tok olsem ol i bin winim dispela gem long wik i go pinis.

Presiden bilong Marane Stoneville Ragbi Klap, Philip Ororoku, i no amamas wantaim gem na i askim long gem i ken kamap gen bihain long ol Wanderers i bin kisim tok orait long pilai wankain gem gen bilong asua i bin kamap long resis bilong tupela wik i go, taim ol Wanderers i bin komplen.

“Long dispela asua, komiti bilong Ipatas Kap i mekim di-

sisen bilong ol Wanderers long baim K1500 fain bipo 8 klok moning o givim gem i go long Marane.

“Mi bin kam stap hia long Kone Tigers pilai graun long 7.30 moning taim long Mande, tasol ol Wanderers i bin kam long 9.45 moning taim na baim fain na dispela em mi pilim olsem em i no orait,” Ororoku i tok.

Komplen bilong ol Marane Stoneville i strongim dai-rekta bilong tonamen, Simon Maima, long rausim gem.

Ol pilaia na opisal bai holim wanpela bung long painim nupela taim na hap bilong resis bihain.



PNG Anda 17 tim i redi long salensim ol Vanuatu long Osenia Futbal Sempionsip. Dispela em i namba tu gem bilong ol long Grup A salens.



Pilaia bilong Nu Kaledonia na pilaia bilong PNG i pait long kisim bal.



Beta bilong Saints i kaikai tit long paitim bal long pilai bilong ol wantaim Yokomo.



Rana bilong Yokomo i kam hom wantaim stail.



Bikpela beta bilong Saints i redi long paitim bal long pilai bilong ol wantaim Gazelle.



Juliet Seri bilong Yokomo i salim bal long han bilong em.



Ketsa bilong Wantok i kisim win.



Beta bilong Bears i swingim bet tasol i no kisim bal.




Rana bilong Gazelle i kisim bes taim pilaia bilong Saints i traim long autim em long namba tu bes.



Pilaia bilong Nambawan Supa i haitim bal long bros bilong em na ol pilaia bilong Hodava i lukluk.



Pilaia bilong EFM i ran long spes taim wan pilaia bilong em i pasim bal taim pilaia bilong Puma Energy i putim was long praivet kampani netbal.



WHITE TUNA FLAKES
DIANA White



WHITE TUNA
insait
K 2.20



Tasty and Flavourful White Tuna for Everyone!

Manufactured by:
RD Tuna Canners Ltd.

Ol Hunters i ranim sot kos long Sentral



Fulbek bilong Hunters, Bland Abavu na Butler Morris i skelim ol save skil bilong ranim bal wantaim Vais Kepten bilong ol Porebada Bulldogs, Maraga Lohia, na ol tim poro.

OL woklain na pilaia bilong Hunters i bin raun long ol viles long Sentral Provins long las wik Trinde, Februari na mekim sampela sotpela kos long kamap kosa.

Ol i ranim dispela kos long lokal ragbi lig long asosiesen long ol komyuniti arere long PNG LNG plent sait.

Ol lokal ragbi lig tim long Boera, Porebada, Papa na Lealea viles i kam bung wantaim ol Hunters, husat i soim ol lokal tim long sampela womap teknik, fitnes trening na ol skil bilong ranim bal.

Long wankain taim, ol Hunters i gat dispela sans long toktok long ol lokal pilaia long drag na alkohol.

Sponsa bilong Hunters na PNG LNG Kumuls, PNG LNG, i helpim ol Hunters long karim aut dispela kos aninit

long asosiesen wantaim Porebada Bulldogs klap, Buria Redsklap bilong Lealea na Borea na Koita Ragbi Lig Asosiesen bilong Papa.

Ol 10-pela pilaia husat i go pas long dispela kos wantaim Vais Kepten, Wellington Albert, na Kosa, Michael Marum, i bin mekim tupela tim long skelim save bilong ol kamap kosa long tripela lokal spot graun.

Vais Kepten bilong Porebada Bulldogs, Maraga Lohia, i soim amamas bilong em na i tok, "Planti bilong ol bipo pilaia bilong PNG LNG Kumul olsem Tara Gau, Airebo Tau-maku, Mike Arere, Dairi Kovae na ol Morea Brata em ol i kam long Porebada.

ridim moa long dispela stori long pes 25...

Strongpela Marasin Bilong Kus Gutpela Prais!



Good Products, Better Prices, ikam long

Johnstons Pharmacies Ltd

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email sales@johnstons.com.pg